

LA CARTA DEL APOSTOL SAN PABLO A LOS ROMANOS

Pablo ucheë mbesa mondo Roma jenda je

1 ¹Co aico co mbesa jêje co. Se rei Pablo. Jesucristo rimba rei se. Dios que seirabo ra. Ucheë nenei nenei sacua. Dios que semingo icúe ra. Ucheë turã nenei nenei sacua. ²—Secheë turã tamondo mbia je, i que Dios cose ra. Ucheë nenei neneisa je ñee. Echeë ngue ique cote ra. ³Dios cheë turã nandembiiranduchĩ Jesucristo riĩ cote. Dios riirĩ ndei Jesucristo. David riirina ngue tu íbii cote ra. ⁴Jesucristo manonde, Espíritu Turã ngue embuquera ra. Dios quirãcuã je que embuquera ra. Dios riirĩ ndei Jesucristo. Nyebe Espíritu Turã embuquera nguiã. Mbia mbiirandu randu sacua Dios riirĩ ndese. ⁵Dios turãte que ure je ra. Jesucristo riĩ. Nyebe ureirabo mingo nguiã ucheë nenei nenei sacua. Ĩ nda mbia mangu chooñoa jenda abe Jesucristo icua. Ĩ nda mbia mangu chooñoa jenda abe Jesucristo cheë mumbayã no. ⁶Sã jê Jesucristo cheë jemumbayãte no. Sã Dios jêirabo no. Jesucristo rimbarã. ⁷Co ambesa mondo quia Rómaa jêje co. Dios chesecua tuchi chõ jê nde. Dios que jemingo icúe uquiatorã nda. Nanderu chõ Dios re. Nandererecua chõ Jesucristo re. Sã ùquĩ turã mbei riqui jêje. Sã ùquĩ ndiqui jembia tuchi.

Pablo oso sete raque Rómaa

⁸—Jesús quiato tuchi chõ ùquĩ ndiqui re, i jate mbia quia jeniã ã. Mangu chooñoa jenda abe. Nyebe aico nguiã gracias i tuchi Dios je co. ⁹Dios cheë asenei senei mbeite quia mbia je co. Eriirĩ niĩ. Dios resa rae aico embesa mbesa jêje a. Aico ñee mbeite Dios je jeniã co. ¹⁰Aico ñee ñee mbeite Dios je co. Ĩ nda Dios semondo jendea. Semondose mose ra aso jendea. ¹¹Seso sete raque jendea. Jembaaquiato quiato sacua Jesús riĩ. Jembirãcuã sacua Jesús riĩ. ¹²Seso sete jendea. Ñimbias sacua nyiese.

Nandeico tuchi sacuã Jesús rui. Nande Jesús nandeicuate resê. ¹³Taso jendea, ae beite rei que se quia ra. Taembaaquiatu quiatu Jesús rîi, ae rei se. Eĩ nda Jesús jêicua secheẽ nguire. Sã mbiamo Jesús icua tuchite secheẽ nguire no. Mbae seriquisã quisã mbeite. Nyebe asoã mbeite nguiã jendea. ¹⁴Jesús cheẽ nenei nenei si ahui aroneãte. Tasenei senei tuchi mbia ja je. Griego ja je. Mbiamo abe je. Eaquiato je. Eaquiatuã abe je. ¹⁵Nyebe aico nguiã icoquiatute co, Jesús cheẽ nenei nenei sacuã jêje. Roma jenda je.

Jesús cheẽ quirãcuã tuchi

¹⁶Aireĩ ireĩ eãte Jesús cheẽ nenei nenei mbia je. Jesús cheẽ quirãcuã tuchi quia ique nguiã aba chiangui rĩ. Aba rirõ sacuã mbae icuã si. Judíos je rane ngue Jesús cheẽ quirãcuã nda. Judío eã je abe no. ¹⁷Jesús cheẽ nandembirandu quia ã. Nande Jesús icua mose, Dios ra nandesei turã uquiatorã. Mbae turã mo nandesaã eãte raque.

Ae Jesús icua quia nae, Dios ra ùquĩ isĩ turã tuchi.

Ûquĩ nda siqui bei cote,

i ñi embesa ji re.

Mbia icuã tuchi Dios je

¹⁸Ae siqui Dios rã eãte nae, ùquĩ nda Dios mbasi ja. Ae siqui icuãte quia nae, ùquĩ nda Ibatenda mbasi ja no. Ûquĩ nandeicuate quia nande co. Ichõiñosa reã ñee andu sereãte quia ñene. ¹⁹Jirandu tuchi rei que Dios rese ra. —Eĩ ae chõ nguiã co, i rei que Dios ee ra. Dios icua sereãte quia ñene. ²⁰Dios rese mbia mae aroneãte raque. Dios quirãcuã ndese mbia mae aroneãte raque. Mbia ra Dios icua uchiangui re, echiao rese mae mae mose. Dios que mbae chao ja nyii ra. Aque mose bei mbia riqui mae mae Dios chiao rese co. Nyebe eriqui nguiã “Dios rese ureiranuãte”, i aroneãte. ²¹Jirandu tuchi rei que Dios rese resê. Ñee turãyã tuchi chõchĩ Dios rîi. Gracias iã ñochĩ Dios je. Nyebe eriqui nguiã ndua icuã icuã mbei. Nyebe eriqui nguiã itongui rĩ mbei. ²²“Ureaquiatute” ichõiño ñochĩ equia ùquĩ. Eaquiato ño siqui nguiã ùquĩ. ²³Hui tuchi que Dios si ra. Ae manaõ mbeite quia, aque si. Sererecua i chõchĩ mbae ao ao ji je cote. Ae ra mano, ùquĩ je chõ eriquichĩ nguiã “sererecua”, i. Mbia raanguia je. Quiaa riinda je chõ eriquichĩ nguiã “sererecua” i. Ae mbebe quia. Ae uchã nguia. Ae nguata quia nguie rese. Ûquĩ je chõ eriquichĩ nguiã “sererecua” i.

²⁴Nyebe Dios hui nguiã esi cote. Mbae icuã naa naa mbei sacuã cote.

²⁵Ñee ñooño tuchi Dios rîi cote. “Nandererecua” i chõchĩ Dios chiao je cote. “Nandererecua” i rocoĩ Dios mii je. “Nandererecua” i bei chõ mbichĩ aba quia Dios mii je. Amén.

²⁶Nyebe Dios erecha ja nguiã cote. Oco chooño sacuã mbae icuã ndese. Ubi icuã ndese. Cuña mo oco oco nyiese si. Cuña ngu raã naa cuña

nongue je. Siqui rocoĩ ngu rese. ²⁷Hombre mo abe hombre nongue mo oseĩ oseĩ. —Seninisirã nde, i ñee ñee uchue si. Oco oco nyiese. Siqui rocoĩ ngũinisi rese. Icha tuchi Dios si. Nyebe Dios riqui nguiã embasi tuchi co cote.

²⁸Dios rese jirandu sereã. Nyebe Dios hui nguiã esi. Siqui bei bei sacuã ubi icuã ndese. Nyebe eĩ eĩ nguiã nyue mbae icuã ndese. ²⁹Eicuã tuchi eriqui ũquĩ. Ico chooño tuchi equia cuña ndese ũquĩ. Ndua ndua icuã mbei tuchi equia ũquĩ. —Aque rã nda se chã, i beite equia emo mbae je ũquĩ. Mbia mbasi chooñote equia ũquĩ. Mbaecha ucuyã ñooño tuchi equia ũquĩ. Mbia iquia iquia chooño tuchi equia ũquĩ. Paama i chooñote equia uchue ũquĩ. Mbia mbiĩrĩ irĩ ñote equia ũquĩ. Mbia ucuyã ñooño mbeite equia ũquĩ. ³⁰Ñee ñooño mbeite equia mbia mo nii ũquĩ. Dios ucuyã tuchi equia ũquĩ. Ñee icuã icuã mbeite equia aba cheẽ ndibishorõ ũquĩ. Ucuasu raã naa ñooñote equia ũquĩ. “Se quiarei i tuchi”, i beite equia ũquĩ. Emo mbiicuã icuã mbeite equia ũquĩ. Ngu cheẽ mumba mumba chooñote equia ũquĩ. Usi cheẽ abe mumba mumba chooñote equia ũquĩ. ³¹Eaquiataũ tuchite ũquĩ. Ucheẽ mumba mumbate ũquĩ. Emo je eturã eãte riqui ũquĩ. Emo icuã si eriqui tesareiate ũquĩ. Eya eã eãte riqui emo ndese ũquĩ. ³²—Ae ũquĩ saã saã nguiã mbae icuã nae, ũquĩ nda amondo tata cuasu, i que Dios ra. Dios cheẽ icuare quiatu eriqui nguiã mbae icuã naa i ite. —Sã emo abe mbae icuã naa naa nandechabe, i chee chee.

Dios mbia cuata tea ja

2 ¹—Dios ra ũquĩ mbasi rã ña, erechĩ nda ũquĩ mbia icuã je. Nde i mose, nde abe ra ndeicuã nyecua mbia je. —Seturãte aico co, ierechĩ nda jẽ! —Ūquĩ ndiqui mbae icuã naa naa ũquĩ, nde i mose, ũquĩ icuã sí chõ eresaã saã nguiã nde abe aque. ²—Ae ũquĩ icuã saã saã nguiã, ũquĩ tambasi, i mose Dios, Dios ra embasi chooño eã. Maende erese quia ra embasi. ³—Dios ra ũquĩ mbasi rã ña, erechĩ nguiã huee. Eraã sí tuchi chõ ereicochĩ nguiã ũquĩ sí raã naa aque. Nde abe ra Dios nembasi ũquĩ ndese resẽ. ⁴Dios ia eãte raque aba icuã ndese. Dios aba mbasi jei eã ndaque aba icuã mosebe. Ñimbirãcuãte aba icuã je. Coche ñene, ereã ñochĩ Dios chĩmbirãcuã mose ndeje. —Eyayã jẽ nda huiicuã ndese chã, i Dios quia nderĩ co. Nyebe eriqui nguiã ñimbirãcuã ndeicuã je. ⁵Ndechĩã ãtã tuchi chõchĩ. Ndeico sereã tuchi chõchĩ Dios rui. Ndeicuã eremunua tuchi chõ nguiã aque re. Dios nembasi nonde. Dios mbia icuã mbasi ja mose ra nde abe mbasi. ⁶Aque mose ra Dios mbia mbuchao chao. Emo emo nda emondo tata cuásuu. Emo emo nda emingo bei no. ⁷Ae eturã mbeite riqui, ũquĩ nda Dios mingõ bei. Nyoĩ sete quia Dios rea re. Siqui bei serete quia mbia mingõ beisa rese re. Nyebe ra Dios emingo bei cote. ⁸Dios ra paama i tuchi mbia icuã je. Mbasi tuchi rae. Mbia mbiicuãsa

tuchi quia ũquĩ nde. Dios cheẽ mumbate quiatu nguĩã. Nyebe ra Dios embasi tuchi. ⁹Ae siqui mbae icuã ndese, ũquĩ ja ra Dios mbasi. Judíos icuã nane nda embasi. Judíos eã abe ra embasi no. ¹⁰Ae siqui mbae turã ndese, ũquĩ je ra Dios turã mbei. Judíos turã nane. Judíos eã abe cote. Mbia ra ũquĩ turã icua tuchi. Dios ra ũquĩ mbia tuchi. ¹¹Co quiatu, i eã nda Dios mbia mo mii je. Mbia mii ndese ra ebia eã. Mae turã ja chõ nda erese.

¹²Ae jirandu eãte Moisés chimbese rese nae, ũquĩ siqui icuã mose ra Dios embasi. Jirandu eãte raque Moisés chimbese rese. Ae Moisés chimbese icua nae, ũquĩ siqui icuã mose ra Dios embasi. Moisés chimbese cheẽ nguire ra Dios embasi. ¹³Ae Dios cheẽ ñandu chooño nguia nae, “taëisi turã” iã nda Dios ũquĩ je. Ae Dios cheẽ mumbayã nguia nae, ũquĩ nguia ra Dios isi turã. ¹⁴Ae judíos eã nae, ũquĩ Moisés chimbese ñandu eã mbeite raque. Ũquĩ mo ae siqui turã turã mbei mbae turã ndese. — Mbae turã nandesaa, ite eicua. Dios cheẽ andu eãte raque emo mose. ¹⁵Ae ae chõ mbae turã icua nguia. Mbae icuã abe icua. Mbae icuã naa mose, “eicua asaã ñochĩ”, i tuchi eicua uchiangui re. Mbae turã abe raã mose eicua tuchi uchiangui re no. ¹⁶Aque mose ra Dios ñee Jesucristo je. Ae icuã mbia saã nyecuayã cuayã nguia nae, ũquĩ nda Jesucristo mbuchecua ja cote. Jesucristo ra mbia icuã mbasi mbae icuã nii cote.

Judíos Moisés cheẽ mumba mumba

¹⁷—Judíos chõ ure re, jenze equia ũquĩ. —Moisés chimbese ra nandemingo bei, jenze chõchĩ equia ũquĩ. —Dios quiarei ebia tuchi ure mii ndese, jenze chõchĩ equia ũquĩ. ¹⁸Ae Dios bite nae, ũquĩ jëicuate quia jë ũquĩ. —Moisés cheẽ ureicuate quia ã. Nyebe mbae turã ureicua jate quia ã, jenze chõchĩ nguia ũquĩ. ¹⁹—Ure mii ño ñeenda Dios icha ureicuachĩ, jenze bei chõchĩ equia ũquĩ. —Itondaru jenda uretesaete, jenze chõchĩ equia ũquĩ. ²⁰—Mbia aquiatuã urembaaquiato quiatu, jenze chõchĩ nguia ũquĩ. —Mbia aracuayã urembaaquiato quiatu, jenze chõchĩ nguia ũquĩ. Jë Moisés chimbese jëicua aba reãte quia ũquĩ. —Moisés chimbese ñee ñooño eãte, jenze raque quia eicua ũquĩ. ²¹Jëaracuayã mbia jembaaquiato quiatuchĩ nguia. ¿Mbaerã jeñimbaaquiato iã jë nyii re? —Mbae ra jembuquiachãchĩ, jenze chõchĩ equia ũquĩ. Jë sí chõ mbae jembuquiachã nguia ũquĩ. ²²—Emo ninisi rese ra jëingochĩ, jenze chõchĩ equia ũquĩ. Jë sí chõ jëingo nguia emo ninisi rese ũquĩ. —Ae je mbia riqui “Dios” i chooño nae, ũquĩ ndese ra jëingochĩ, jenze chõchĩ equia ũquĩ. Dios abareã mbae jembuquiachã quiachã ñochĩ nguia ũquĩ. ²³—Dios cheẽ ureicua tuchi quia ure ã, jenze chõchĩ equia ũquĩ. Jë sí echeẽ jemumbate quia ũquĩ. Nyebe mbia riqui nguia ñee turã eãte Dios riĩ ã. ²⁴Nyebe embese ji cheẽ ndiqui nguia ique ã cote. Jë Dios cheẽ mumba mose, judíos eã ndiqui ñee icuã tuchi Dios riĩ ã.

25 Coche circuncisión jěsaã saã nguiã Dios je, jěingo bei mose Dios cheẽ ndese. Jěingo eã mose Dios cheẽ ndese, circuncisión naa eã naanguia chõ jěingo nguiã ùquĩ. 26 Ae circuncisión saã eã nguia nae, ùquĩ siqui mose Dios cheẽ ndese, circuncisión naande raanguia chõ eriqui nguiã ùquĩ. 27 Ae circuncisión saã eã nguia nae, ùquĩ siqui mose Dios cheẽ ndese, Dios ia tuchi chõ ùquĩ ndese re. Eyare rocoĩ jendese. Jě nguia Dios cheẽ jemumba mumbate nguiã. Dios cheẽ jěicuate raque. Circuncisión jěsaã saãte raque. 28 Ae judíos Dios cheẽ mumba mumba quia nae, judíos tuchi eã ño ùquĩ nde. Circuncisión naa naa ndaque. Ae circuncisión saã nguia nae, ùquĩ siquiã mose Espíritu Turã ndese, circuncisión turã eã ño ùquĩ nde. 29 Ae Dios isi tuchi quia uchiangui re, ùquĩ nguiarei judíos tuchi. Ae siqui Espíritu Turã ndese, circuncisión tuchi chõ ùquĩ cote re. Ùquĩ je ra mbia achõ ñee turã eã. Dios abe quia ra ñee turã ee.

3 1 ¿Mbaerã judiorã sete riqui mbia re? ¿Mbaerã circuncisión sete riqui mbia re? 2 Eturãte quia mbia je re. Judíos je quiatu ngue Dios ucheẽ mondo nguiã. Mbiamo je eã. 3-4 Judíos mo hui hui raque Dios cheẽ si. Dios quia ra ñee ñooñoã mbei. Echeẽ nguia ra io bei. Mbiamo hui hui raque esi. Mbiamo ñee ñooño ndaque. I ñi embesa ji re:

Ndecheẽ nda io tuchi mbiamo resa rae.

Mbiamo icuã mose ndeje, nde quia ra ere tuchi mbiamo, i que embesa ji ra. 5 Jemo ngue ñee no nda: —Dios turãte riqui nandeicuã je co. Mbae icuã nandesaã saã mbei chõ nguia. Mbiamo mae sacua Dios turã ndese. Dios nandeicuã mbasi mose, Dios icuãte, i chõchĩ jemo. ¿Mañi nande ra ùquĩ ñee mose re? 6 Ichõiño tuchi chõ ùquĩ nde. Dios icuã aroneãte. Dios icuã mose, eĩ nda Dios mbiamo icuã mbasi aroneãte rei. 7 Jemo ngue ñee ño nda. —iNandecheẽ ñooño ño nguia jě! Nandecheẽ ñooño mose, mbiamo ra ñee turã Dios riĩ. “Ñee ñooñoã reã tuchi quia Dios riqui re,” i ra mbiamo Dios riĩ cote. Nyebe Dios riqui nguiã nandembasi ãte nandecheẽ ñooño mose, i chõchĩ jemo. 8 —Mbae icuã nandesaã saã ño. I nda Dios turã nyecua mbiamo je, i chõchĩ jemo. Urecheẽ ãte ure ùquĩ ndesẽ. Ae ñee nguia ùquĩ, ùquĩ nda Dios mbasi.

Mbiamo eturã eãte

9 Judíos chõ nande re. ¿Nandeturã nda eriqui reĩ mbiamo si re? Tei. Nandeturã eã ño esi re. Nandeicuã ja chõ ñene. Judíos eã icuã ja chõ ñene. Judíos icuã ja chõ eno nde. 10 I ñi embesa ji re:

Emo eturã eãte. Aque mii mo eã.

11 “Dios icha taicua”, iãte emo.

“Dios rese taico”, iãte emo.

12 Mbiamo que icha icha jate Dios si ra.

Eicuã jate que eriqui ra.

Emo mbae turã mo saã eãte.

Aque mii mo eã.

¹³ Ũquĩ quiarei mbia raaque tã tãsa rã.

Aba mbia eã.

Sã eriqui ñee icuã mbei.

Mbia mbiirĩ irĩ tuchi ñee ñooño uchuru je.

Mbei rasi rã ño echeẽ nde.

Aba mbasi.

¹⁴ Echeẽ icuã achõ tuchi chõ ñene.

Mbia mbiicuãsa tuchi chõ echeẽ nde.

¹⁵ Mbia iquia chooño ño ñene.

¹⁶ Mangue chooñoa ño eriqui nguiã mbae icuã naa naa.

Mbia mbiayã ñooño.

¹⁷ İco chooñoa mbei mbia je.

¹⁸ Dios rese ndua eã tuchi,

ı ñi embesa ji re. ¹⁹Dios que Moisés chimbese mee ja judíos je ra. Embesa ji mumbayã sacua. Mbia huiicuã icua ja sacua. —Dios cheẽ nandemumba tuchi chõ nguia re, ı nda mbia ja chã. ²⁰Emo ñee aroneãte. —Embesa ji amumbayã mbeite quia co. Nyebe ra Dios seisi turã, ı aroneãte emo. Dios que Moisés chimbese mee mbia je ra. Mbia huiicuã icua ja sacua.

Dios icuasa quia ra siqui bei

²¹⁻²²Dios que Jesús turã teacuquia nande je cote ra. Ae que mano nandeicuã ndiquicharõ sacua nda. Nande Jesús icua mose, Dios ra nandeisi turã cote. Eĩ ja chõ Dios mbia je re. Dios bia eã ño mbia mo mii ndese. —Jẽ Moisés chimbese mumbayã mose, taẽisi turã, iãte Dios. —Jẽ Jesús icua mose, ũquĩ mose quiatu ra jaẽisi turã, ite Dios. Embesa ji ñiinda abe que ñee ñee Jesús riĩ nyii no nda. ²³Nandeicuã ja chõ ñene. —Aque eturãte, iã nda Dios nandemo je. ²⁴Nandeicuãte raque. Dios quia eturãte nande je re. —Mbae mo jemondo jẽicuã ndibishorõ, ı ate Dios. Jesucristo que mano nandeicuã ndibishorõ ndesẽ. Nyebe Dios riqui nguiã mae turã nanderese co. ²⁵Dios que Jesucristo mondo mbia je ra. Mano sacua mbia icuã ndiquicharõ. —Jesús que mano seicuã ndibishorõ nda, nande ı mose, ũquĩ mose ra Dios nandemingo bei. Dios que mae ñooño mbia icuã ndese nyii ra. —Seriirĩ nguia ra mano nguiã eicuã ndiquicharõ, ı que ra. Echeẽ ngue ique cote ra. Dios uturã ndeacuquia mose que echeẽ ique cote ra. ²⁶Dios riirĩ ngue mano mbia icuã ndiquicharõ nda. Mbia mae sacua Dios turã ndese. Dios turã mbeite. Mbia icuã isi turã nonde. Mbia Jesús icua mose ra Dios mbia isi turã.

²⁷Nande ae ra nandeicuã nandembutiã eã. Dios ae quia nandeicuã mbutiã nguiã, Jesús icua mose. Nyebe nandeico nguiã nandecuasu raã naa aroneãte. Moisés chimbese que nandemumba mumbate quia resẽ.

²⁸Mbia Jesús icua mose, aque mose quia ra Dios mbia isi turã. —Taẽisi

turã, jê Moisés chimbesea mumbayã mose, iãte Dios nande je. —Jê Jesús icua mose, ùquĩ mose quiatu ra jaëisi turã, ite Dios nande je. ²⁹Judíos achõ nderecua eã ño Dios re. Judíos eã abe rerecua chõ ñene. ³⁰Emo abe eãte Dios. Dios miĩ ño ñene. Ae Jesús icua quia nae, ùquĩ nda Dios isi turã ja. Judíos abe isi, Jesús icua mose. Judíos eã abe isi, Jesús icua mose no. ³¹Nande Jesús icua mose, Dios cheẽ mbesa ji riqui ua eã mbeite nande je co. Nande Jesús icua mose, Dios cheẽ nda nandemumbayã tuchi cote.

Abraham abe Dios icua

4 ¹Nandendua mbiĩ na Abraham ndese. Nandei ñiinda tuchi quia Abraham nde. ²Cose que Dios Abraham isi turã nda. Abraham mbae turã naa naa eã mose que Dios eisi turã nda. Dios icua mose quiatu que Dios eisi turã nda. Nyebe Abraham uturã naa naa aroneãte nguiã. ³I ñi embesa ji re:

Abraham ngue Dios icua ra.

Nyebe Dios eisi turã nguiã,

i ñi embesa ji re. ⁴Sã emo ndiqui quiei quiei emo je no. Mbae mo ndibishorõ. Ae echa mondo quia ee, mondochõ eã ño nguiã ee. Embae raã naa ndibishoronda chõ ùquĩ nde. Eĩ eã ño Dios re. ⁵Dios chõ mbia icuã isi turã nguiã. Emo Jesús icua mose, ùquĩ nda Dios isi turã. Emo mbae turã naa naa eã ndaque. Jesús icua mose, aque mose chõ Dios “ndeturãte seje,” i ee. Mbae turã naa naa eã ndaque. ⁶David abe que ñee nda: “Ae je Dios ñee, ‘ndeturãte seje,’ i mose ee, aque ia tuchi chõ ñene. Mbae turã naa eã ndaque. Dios icuate quia ñene,” i que David ñee nda. ⁷Co rei David chimbesea co:

Ae icuã Dios mbutiã nae, ùquĩ ia tuchi chõ ñene.

⁸Ae icuã ndese Dios riqui mae ãte nae, eicuãte raque, Dios ra eisi turã.

Ùquĩ ia tuchi chõ ñene,

i ñi David chimbesea re. ⁹¿Aba icuã ño nda Dios mbutiã ña? Embia sacua ña. ¿Judíos icuã achõ nda embutiã nde? ¿Ae circuncisión saã nae, ùquĩ achõ icuã nda embutiã nde? Tei. Ùquĩ achõ eã ñene. Abraham Dios icua mose, aque mose tuchi chõ Dios eicuã mbutiã nguiã esi. ¹⁰Abraham circuncisión naa eã mose chõ Dios eicuã mbutiã nguiã. Circuncisión naa nonde. ¹¹Abraham Dios icua mose chõ ngue Dios eicuã mbutiã nguiã. Aquere quiatu ngue Abraham circuncisión naa nguiã cote. Circuncisión ndei marca Dios mbae. Dios Abraham isire chõ circuncisión naa nguiã Abraham je. —Abraham ngue aisi turã nda, i ñe Dios re. Ae circuncisión saã eã nae, ùquĩ abe chõ “seru” i nguiã Abraham je, Jesús icua mose. ¹²Ae circuncisión saã nae, ùquĩ abe chõ “seru” i nguiã Abraham je, Jesús icua mose. Ùquĩ nyiicua chõ Dios re. Sã Abraham nyiicua Dios no. Circuncisión naa eã mose no.

Abraham Dios icua mose, Dios ucheẽ mbuchebiã mbei ee

¹³Dios que ñee Abraham je cose ra. —Ibi tamondo ja ndeje nembraerã. Nderiirĩ mbaerã abe no, i que ee ra. Secheẽ mumbasa reã je chõ ibi tamondo, iã ño Dios re. —Ae seicua quia, aque je chõ tamondo, i que Dios Abraham nii nda. ¹⁴—Nandeico bei mose Moisés chimbasa rui, aque mose ra Dios nandemingo bei, i chõchĩ judíos mo. Ñquĩ mose quiatu ra nandeico rei Jesús icua chooño. Ñquĩ mose quiatu ra Dios cheẽ ique ãte rei nande je. ¹⁵—Ñ jesaã saã, i mose Dios, emo echeẽ mumba mose, ñquĩ nda embasi. —Ñ jesaã saã, iã mose, emo nda embasiã cote.

¹⁶Dios turãte quia ñene. Nyebe eriqui nguiã mbae mondo chooño nande je eicua mose. Judíos achõ je eã ño eriqui nguiã mbae mondo mondo. Judíos eã je abe chõ eriqui nguiã mbae mondo mondo, Dios icua mose. Sã Abraham Dios icua no. Sã Dios mbae mondo mondo ee no. Nyebe nandeico nguiã “nanderu” i Abraham je co. Ae rane nguiatu ngue Dios icua nguiã. ¹⁷Nyebe embesa ji riqui nguiã i:

Dios que ñee Abraham je ra.

“Nde ra mbia i tuchi.

Ibi jenda ja i tuchi ra nde”, i que Dios Abraham je ra, i que embesa ji ra. Dios ra mbia mangu chooñoa jenda ja isi turã, Jesús icua mose. Dios cheẽ sí tuchi chõ ã nde. Dios ae mbia raaque mbuquera nguiã. Ae emoãte namo nae, Dios ae ra ñquĩ nyao no. ¹⁸—Nderiirina tamee ndeje. Eretiirĩ nda cote. Mbia ja i ra nde cote, i que Dios Abraham je ra. Abraham ngue “nyia, eno”, i Dios cheẽ mose ra. Amei tuchi raque. Tiirĩ aroneãte raque aba je. ¹⁹Amei tuchite raque. Cien añote raque. Eninisi abe arite raque. Eninisi rie chumate raque. —Dios ra seriirina mee seje ucheẽ nguire, i que Abraham nda. —Ureimate nyeresẽ. ¿Mañi nda Dios ureriirĩ mee ure je re? i ãte que Abraham nda. ²⁰Abraham ngue “nducua” iã mbeite quia Dios cheẽ mose ra. “Nyia, eno”, i beite que equia Dios cheẽ mose ra. Ñee turã mbei que equia Dios riĩ nda. ²¹—Dios quirãcuã tuchi quia ñene. Ae ra ucheẽ nyabiã mbei ñeende seje, i que Abraham nda. ²²Nyebe Dios Abraham isi turã nguiã. —Abraham ndiqui seicua tuchite co, i que Dios ra. ²³⁻²⁴Abraham mii je eã ño Dios riqui nguiã ñee. —Abraham seicuate. Nyebe aico nguiã eisi turã co, i que Dios ra. Abraham mii je eã ño embesa ji riqui nguiã ñee. Nande abe je chõ eriqui nguiã ñee. Nande Dios icua mose, Dios ra nande abe isi turã. Dios sí que Jesús raaque mbuquera ra. ²⁵Dios que Jesús mbu íbii nande je ra. Mano ngue nandeicuã ndiquicharõ nda. Aquere que Dios embuquera si cote ra. Nandembitirõ sacua ngue Dios embuquera ra.

Nande Jesús icua mose, Dios riqui nandehi turã

5 ¹Ñ nandeico Jesucristo icuate ã. Nyebe Dios riqui nguiã nandehi turãte cote. Nyebe Dios riqui nguiã nandembiate cote. ²Ñ nandeico

Jesucristo icuate ã. Nyebe Dios riqui turâte nguiã nande je co. Dios turã tuchi. Dios ra nandemingo Jesucristo rã si tuchi cote. Ûquĩ ño nandesaarõ arõ nguiã ã. ³Ûquĩ miĩ eã ño nandembia nguiã. Mbia icuã icuã ndaque ra nande je, ùquĩ mose abe chõ nda Dios nandembia no. Mbia icuã icuã mose nande je, Dios ra nandechiã mbucoi turã. Nandeico tochi sacuã. ⁴Nandeico tochi mose, Dios ia tuchi ra nanderese. Dios ia mose nanderese, Dios cheẽ nandesaarõ arõ na. Sã echeẽ ique rã nande je. ⁵Nande Dios cheẽ ndaarõ arõ mose, ae ra ucheẽ nyabiã. Ae quiatu ngue Espiritu Turã mondo nguiã nande je. —Dios riqui nyesequate jendese co, i Espiritu Turã nguia nande je co.

⁶Mbae turã ngue nandesaã aroneãte nandechue, aque mose que Cristo mano nande je ra. Nandeicuã mbitirõ sacuã. ⁷Mbia mo mano aroneate emo ndibishorõ. Nande turã mose, aque mose abe ra emo mano aroneate nanderibishorõ. Eturã tuchi mo ndibishorõ nguia emo mano sete raque reae. ⁸Cristo quiatu que mano nanderibishorõ nandeicuã tuchi mose ra. Nyebe nandeico nguiã ñee: —Dios riqui nyesequa tuchite nanderese co, i. ⁹Cristo mano mose que nandeicuã mbitirõ cote ra. Ae ra nandemingo icúe Dios mbia icuã mbasi mose. ¹⁰Dios ririĩ ngue mano nande je ra. Nande Dios ucuayã mose. Ae quia ngue eturã mbeite riqui nguiã nande je. Dios que “sequiatorã jẽ”, i nande je cote ra. Nyebe ra nandeico tuchi erese cote. Jesús quiatu ngue quera sichĩ nguiã nande je cote. ¹¹Nyebe nandeya tuchi riqui nguiã Dios rese co. Jesucristo riĩ. Jesucristo quiatu ngue mano nguiã nande je.

Adán na eã tuchi chõ Jesucristo re

¹²Mbia miĩ nane ngue siqui nyii ra. Aque rane ngue mbae icuã saã nande je ra. Nyebe mbia icuã jate riqui nguiã cote. Nyebe Dios riqui nguiã ñee. —Mbia ra mano ja, i cote. ¹³Mbia que mbae icuã saã saã ndei quia nyii ra. Moisés Dios cheẽ mbesa nonde. —Dios cheẽ ngue jemumbachĩ nda, i aroneãte que aque mose ra. Dios cheẽ mbuchecua iriãte quiatu ngue aque mose re. ¹⁴Adán nane ngue Dios cheẽ mumba cose ra. Aque mose bei chõ ngue mbia mbae icuã naa naa nguiã cote. Nyebe mbia riqui nguiã mano mano ja huiicuã mose cote. Moisés que Dios cheẽ mbesa chee ra. Moisés embesa nonde que mbia mano mano ja huiicuã mose ra. Jesucristo rã eã tuchi chõ Adán nde.

¹⁵Adán nane tuchi que mbae icuã saã nda. Jesucristo quiatu que mbia rirõ nguia mbae icuã si ra. Adán mbae icuã naa mose, aque mose bei que mbia mano mano cote ra. Jesucristo mbae turã naa mose, ae que mbia icuã mbitirõ tirõ cote ra. Dios turã niĩ. Jesús chisaã nguia rei Adán chisaã na eã tuchi. ¹⁶Adán ae rane ngue mbae icuã saã cose ra. —Mbia ra mano mano ja cote, i que Dios cote ra. Adán icuã ndese maende. Ae Adán saã icuã nande je nae, aque je que Jesucristo mano nda. Jesucristo turâte

que mbia je cote ra. Nyebe Dios riqui nguiã nandeisi turã, nandeicuã ndese mae ndocoĩ. ¹⁷Adán ae que mbae icuã saã nyii ra. —Mbia ra mano mano ja cote, Adán mbae icuã naande, i que Dios cote ra. Jesucristo ae que mbae turã saã mbia je cote ra. Mbia icuã mbutiã sacuã esi. Ae Jesús turã icua quia nae, ũquĩ nda Dios mingo turã mbei, ũquĩ icuã ndese mae ndocoĩ.

¹⁸Adán ae que mbae icuã saã nyii ra. —Mbia ra mano mano ja cote, i que Dios cote ra. Adán icuã ndese maende. Aquere que Jesucristo mbae turã naa mbia je cote ra. Mano nguiatu ngue mbia riquicharõ nde. Nyebe Dios riqui nguiã nandemingo bei co cote. Jesús rii ae ñene. ¹⁹Adán Dios cheẽ mumba mose, mbia mbiicuã ja que ũquĩ cote ra. Jesucristo Dios cheẽ mumbayã mose chõ mbia tubiriã mbuturã nguiã no. ²⁰Dios que ñee Moisés je ra. —Secheẽ embesa mbia je, i que ee ra. Ñ nda mbia jirandu tuchi huiicuã ndese. Mbia icuã i i tuchi mose, eĩ ño Dios turã i i tuchi mbia je no nde. ²¹Adán mbae icuã naa mose, mbia mbiicuã ja chõ ũquĩ nde. —Mbia ra mano mano cote, i que Dios cote ra. Jesucristo que mano nandeicuã ndiquicharõ cote ra. Aque mose que Dios uturã ndeacuquia tuchi nande je cote ra. Nandembuturã sacuã cote. Nandemingo bei sacuã cote.

Nandeyasu chõ nandeico nguiã ã cote

6 ¹¿Mañi nande ra cote re? ¿Mbae icuã nda nandesã i i re? ¿Dios turã i i sacuã nande je re? ²Tei. Dios biãte ũquĩ. Jesús rese que nandemano ndesẽ. Nandemano ngue mbae icuã naa eã sacuã ndesẽ. ¿Mañi nande ra mbae icuã naa naa si re? ³¿Jëiranuãte bautizar i rese re? —Jesús resenda tuchi chõ ũquĩ ndiqui re, i nda mbia bautizar ire nande je chã. Nande bautizar ire, nandemanonde raanguia chõ ũquĩ nde. Mbae icuã naa eã sacuã cote. ⁴¿Mbaerã ño bautizar nande chã? —Amano ngue Jesús rese ra, i chõ bautizar i re. —Seati que Jesús rese ra, i chõ bautizar i re. —Dios que sembuquera si Jesús rese ra, i chõ bautizar i re. Sã Dios quirãcuã Jesús mbuquera eraaque mose no. Eĩ nande chõ siqui nandeyasu ae.

⁵Nandeico Cristo rese ã. Nandemano mose Cristo rese, nandereco yasu chõ nandeico nguiã erese ã. ⁶Cristo mbucha mose ira rese, nandeicuã abe que Dios mbucha ira rese ra. Nande mbae icuã osei chiã sacuã ño ũquĩ nde. Mbae icuã nimba nda nandeico eã cote chã. ⁷Mbia raaque quia mbae icuã saã aroneãte nguiã. Eĩ nande chõ nguiã mano mose Cristo rese ã. Mbae icuã naa aroneã. ⁸Nandemano mose Cristo rese ira rese, nandemingo bei ra uchiese cote. Ae rã si. ⁹Cristo que mano nda. Quera si que cote ra. Aquere ra mano siã cote. ¹⁰Aque mii ngue Cristo mano mbia icuã je ra. Quera si que cote ra. Mano si eã ndae. Siqui bei equia Dios rese co. ¹¹Jendaaque chõ jësaã saã mbae icuã je. Jenderecuarã eã mbae icuã

cote. Jesucristo rese nandeico tuchite ã cote. Mbae yasu rã ño nandeico nguiã Jesucristo rese ã cote.

¹² iMbae icuã ndese ra jëingochĩ jenderecuarã jê! Jê mba e icuã oseï mose, ijêteachõ ño jê! ¹³ iJendete ra jemee meeçhĩ mbae icuã je jê! Dios je quia jendete jemee. Mbae turã naa sacuã. Cristo rese que jemano ndesẽ. Jêyasu chõ ngue jêquera si Cristo rese resẽ. ¹⁴ Nandererecuarã eã nda mbae icuã cote. Moisés chimbessa rui eã ño nandeico nguiã ã cote. Dios turã ndui ae chõ nandeico nguiã ã cote.

Mbae turã nimba chõ nandeico cote

¹⁵ Dios turã ae nandemingo nguiã. ¿Ûquĩ mose ra mbae icuã nandesaã saã nde? Tei. Dios biãte ùquĩ. ¹⁶ Nande nandechimondo mose mbae icuã je, mbae icuã nda nandererecuarã cote. Mbae icuã nda nandequia chee cote. Nande nandechimondo mose Dios je, ae ra nandererecuarã cote. Ae ra nandemingo bei mbae turã ndese cote. ¹⁷ Jëingo bei que mbae icuã ndese jenderecuarã nyii ra. Mbia Jesús cheẽ nenei nenei mose jêje, jëisi turã ño ngue cote ra. ã jëingo echeẽ mumbayã ã cote. Nyebe aico nguiã gracias ite Dios je co. ¹⁸ Dios que jendirõ mbae icuã si cote ra. Mbae icuã ndese ra jëingoã cote. Mbae turã ndese bei ra jëingo cote. ¹⁹ Secheẽ ambuchecua tuchi quia jêje co. Jê eicua tuchi sacuã. Jendete que jemondo tuchi mbae icuã je nyii ra. Jê ngue jëingo i i tuchi mbae icuã ndese nyii ra. Jendete jemondo Dios je cote. Mbae turã naa i i sacuã cote.

²⁰ Mbae icuã mbaerã ño jëingo nguiã cose. Mbae turã ngue jësaã aroneãte quia aque mose ra. ²¹ Jëireite mbae icuã naa naande cote. Jenyisaã saã mbae icuã ñiinda, ùquĩ ngue mbae turã mo mondo ãte jêje resẽ. Ae mbae icuã saã i ite quia, ùquĩ nda mano. ²² Dios que jendirõ mbae icuã si cote ra. Dios rimba chõ jê cote re. Nyebe Dios jemingo nguiã icúe mbae icuã si. Nyebe ra Dios jemingo bei ibate manonde cote. ²³ Ae mbae icuã saã saã nguiã nae, ùquĩ nda Dios mbasi bei manonde. Ae Jesucristo icua quia nae, ùquĩ nguiatu ra Dios turã mingo bei. Mbae turã naa eã ndaque. Dios turãte quia ee re.

Eraaque rã ño nandeico nguiã Moisés chimbessa je cote

7 ¹ Sã jenderecua ibi jenda mo no. Echeẽ jemumba aroneate no. Jemano mose, jenderecuayã nda cote. ² Sã cuña mo ndiqui ngu rese no. Cuña mo ngu rerequia mose, sã eriqui bei erese. Eru mano mose, aque mose ramo nda siqufã erese cote. Aque mose ramo nda ae ae riqui cote. ³ Ngu reco mose, siqui aroneãte emo ndese. Siqui mose emo ndese, Dios cheẽ mumba chõ ùquĩ nde. Eru mano mose, aque mose quiatu ra ngu mo ndea cote. Dios cheẽ mumba eã ño ùquĩ nde.

⁴ Eraaque rã ño jëingo nguiã Moisés chimbessa je ùquĩ cote. Cristo quiatu que mano jeniã nda. Quera si que jeniã no nda. Cristo rese chõ

jëingo nguiã ùquĩ cote. Dios je mbae turã naa naa sacua ño jëingo nguiã erese ùquĩ cote. ⁵Nandeico mose mbae icuã ndese nyii, mbae icuã achõ ño ngue nandehosei chousei quia aque mose ra. Nandebi tuchi que Dio s cheẽ mumba mumba aque mose ra. Nyebe que nandeico mbae icuã naa i i tuchi aque mose ra. Eĩ nda nandeicuã nandequia rei aque mose. Espiritu Turã nandembiasu eã mose. ⁶Eraaque rã ño nandeico nguiã Moisés chimbesa je ã cote. Moisés chimbesa rui eã ño nandeico nguiã ã cote. Dios cheẽ mii ndui chõ nandeico nguiã ã cote. Espiritu Turã nguiatu ngue nandembiasu nguiã. Espiritu Turã ño nandembaaquiutu nguiã ã cote. Moisés chimbesa achõ eã ño cote re.

⁷—Moisés chimbesa icuãte, ae ãte raque quia co. Moisés chimbesa quiatu que sembiirandu seicuã ndese resẽ. —Eicuãte quia emo mbae osei osei riqui re, i que Moisés chimbesa ra. Eĩ nda seiranuãte rei ùquĩ ndese. Moisés chimbesa eande ndae. Moisés chimbesa ae ngue sembiirandu nguiã ùquĩ ndese. —Eicuãte ùquĩ, i seje. ⁸Moisés chimbesa sembiirandure mbae icuã ndese, mbae icuã achousei i i tuchichĩ cote. —Mbae icuã nda jësaã saãchĩ, i mose chõ mbae icuã achousei i i tuchichĩ cote. Emo Moisés chimbesa icuayã mose, mbae icuã abe ra eicuayã no. ⁹Moisés chimbesa que aicuayãte quia nyii ra. Seturã aico rei aque mose. Moisés chimbesa que aicua cote ra. Eicua mose que echeẽ amumba i i tuchi cote ra. Ùquĩ mose que seicuã aicua cote ra. ¹⁰Mbia mingo bei sacua ndaque Moisés chimbesa. Ae que semingo bei eã nda. Moisés chimbesa amumba mumba bei chõchĩ. Nyebe aico nguiã isho tuchi Dios si aque mose. ¹¹Seicuã ño ngue sembiirĩ irĩ mbei quia nyii ra. Se Moisés chimbesa icua mose, seya eã tuchi que aque mose cote ra. Seicuã nda seiquia chee, ae que se ra. ¹²Moisés chimbesa turãte raque. Dios cheẽ ndaque.

¹³Moisés chimbesa turãte. Ùquĩ je eã ngue Dios paama i seje ra. Seicuã ae quiatu que Dios mbupaama i seje ra. Moisés chimbesa que sembiirandu tuchi seicuã ndese ra. Se Moisés chimbesa turã icua mose, ùquĩ mose que seicuã Dios mbupaama i seje ra. Nyebe Dios Moisés chimbesa mee nguiã nande je. Nandeicuã mbuchecua tuchi sacua nande je.

Nandechianqui renda icuã ño nandeisi isi nguiã

¹⁴Moisés chimbesa turãte raque. Se ae seicuã nde. Mbia chõ se re. Moisés chimbesa amumba mumba chõchĩ nguiã co. ¹⁵Mbae turã asaã mbite raque. Mbae icuã asaã eã mbite raque. Mbae icuã nguiã seisi isite nguiã. Mbae turã uquia reã. ¿Mbaerã aico mbae turã naa eãte re? ¹⁶Ae asaã sereãte quia nae, ùquĩ asaã mbeichĩ. Moisés chimbesa turãt e raque. Aico echeẽ mumba mumba beichĩ. ¹⁷Se ae chõ eã ño aico nguiã mbae icuã naa naa co. Sechiangui renda icuã nguiã “mbae icuã esaã saã”, ite nguiã seje co. Nyebe aico nguiã mbae turã mo naa eã mbeite co. ¹⁸Seicuã tuchi chõchĩ se. Seturã mo eã tuchichĩ se. —Mbae turã tasaã, aete raque

quia co. Aico mbae icuã naa naa mbei chõchĩ co. ¹⁹Sebite raque mbae e turã. ¿Mbaerã aico mbae turã naa eãte re? Sebiãte raque mbae icuã. ¿Mbaerã aico mbae icuã naa naa mbeite re? ²⁰Se ae eã mbae icuã asaã saã nguiã. Sechiangui renda icuã nguia “mbae icuã esaã saã” ite nguiã seje. Sechiangui renda icuã ño seisi isi nguiã mbae turã si co.

²¹“Mbae turã tasaã”, i mose se, mbae icuã ño seriquisã quisãchĩ nguiã co. ²²Sebite raque Dios cheẽ sechiangui re. ²³—Dios cheẽ ndese taico, ae rei nguiã sechiangui re co. Sechiangui renda icuã nguia seriquisã quisãte nguiã. Nyebe aico nguiã mbae icuã naa i ite. ²⁴⁻²⁵Dios cheẽ ndese aico sete raque. Sechiangui renda icuã nguia semingo beite nguiã mbae icuã ndese. Seraaque aico co. Nyebe seya eãte aico co. ¿Aba quia ra seicuã mbitirõ nde? Jesucristo quia ra seicuã mbitirõ cote. Nyebe aico gracias i tuchi Dios je co.

Espíritu Turã ndiqui nandembui mbae icuã si

8 ¹Ae Jesucristo icua quia nae, ùquĩ nda Dios mbasiã mbei. ²Nande Jesucristo icua mose, Espiritu Turã nda nandechiã mbiasu. Espiritu Turã nda siqui nanderese, mbae icuã naa eã sacuã. Eĩ nda nandemano mbeite rei, mbae icuã naa naa mbei mose. ³Moisés chimbesa que nanderirõ aroneãte mbae icuã si ra. Echeẽ nguiatu ngue nandemumbayã aroneãte nguiã. Mbiate quiatu ngue nande re. Nandequirãcuã nea. Dios que ndua nanderese ra. Nyebe nguiirĩ mondo nguiã nande je. Mbia rã ngue Jesús ru íbii ra. Mbia icuã jate raque. Ae miĩ ngue eicuã eã nda. Ae que mano nandeicuã ndiquicharõ nda. Nyebe nandererecua eã ño mbae icuã cote re. ⁴Jesús que mano nande je ra. Nyebe mbae icuã ñimbirãcuã eãte nande je cote. Nyebe Dios cheẽ nandemumbayã arondete namo cote. Espiritu Turã ndui chõ nandeico nguiã cote. Mbia icuã ndui eã ño nandeico nguiã ã cote. ⁵Ae siqui quia Espiritu Turã ndese nae, ùquĩ ño siqui nguiã Dios cheẽ ndui si. Ae siquiã nguia Espiritu Turã ndese nae, ùquĩ ño siqui nguiã uchiangui renda icuã ndui si. ⁶Ae siqui quia Espiritu Turã ndese, ùquĩ ia bei ra eriqui. Siqui bei rae. Ae siquiã nguia Espiritu Turã ndese, ùquĩ nda siquiã. Mano ndae. ⁷Nandechiangui renda icuã nguia siqui icuã icuã mbeite nguiã Dios je. Nandechiangui renda icuã nguiarei Dios cheẽ mumbayã aroneã. ⁸Ae siqui bei quia uchiangui renda icuã ndui, ùquĩ siqui aroneãte Dios cheẽ ndui.

⁹Eĩ jenye eãte raque jẽ. Espiritu Turã ndui chõ jẽingo nguiã jẽ. Espiritu Turã nguia siqui nguiã jeñiangui re. Espiritu Turã siquiã mose emo ñiangui re, Cristo rimba eã ño ùquĩ nde. ¹⁰Jesucristo riqui jeñiangui re ùquĩ. Jendete ra mano ndaque mbae icuã je. Espiritu Turã nda jeãingue mingo bei ibate. Dios quiatu ngue jẽisi turã nguiã. ¹¹Dios que Jesucristo raaque mbuquera ra. Eĩ si ra Dios nanderete raaque mbuquera Espiritu Turã quirãcuã je no. Eĩ si ra nanderete mbiasu, Espiritu Turã siqui mose nandechiangui re.

¹²Nandechiangui renda icuã ndui nandeico aroneãte cote.

¹³Nandechiangui renda icuã ndui nandeico mose, nandemano mbei ra equia. Espiritu Turã nandebi icuã mbutiã mose, nandemingo bei rae. ¹⁴Ae je Espiritu Turã ndiqui ñee nae, “eĩ jenye” i nae, Dios rimba chõ ùquĩ nde. ¹⁵Nande Espiritu Turã isi mose, aque mose bei chõ Dios riirĩ nande cote re. Dios rimbachõ eã ño nande cote re. Dios riirĩ tuchi chõ nande cote re. Nandesiquiche tuchi que equia Dios si nyii ra. Nandesiquicheãte esi namo cote. —Paba, nande chõ nguiã e e co cote. ¹⁶—Dios riirĩ tuchite jẽ, i chõ Espiritu Turã nguiã nandembiirandu tuchi. —Dios riirĩ tuchi rei nande re, nande chõ nguiã nande abe nandechiangui re co. ¹⁷Dios riirĩ tuchite quia nande re. Nyebe ra Dios mbae mondo tuchi nande je Jesucristo rese. Sã ñi mbia Jesucristo mbasi cose no, eĩ si ra mbia nandembasi nande abe. Aquere ra nandeico turã mbei erese ibate cote.

Mbae turã mbei jee ra nande je nandeico mose ibate

¹⁸Mbia ra nandembasi raque a nyii. Dios ra nandererao bei ibate cote. Aque mose ra mbae turã mbei nande je cote. Nyebe ra nandetesarei nanderasi jua si cote. Nandeico bei mose ibate. ¹⁹Dios ra huiicuasa mbuchecua ja aque mose. —Co rei seicuasa co. Co abe no. Co abe no, i ra Dios aque mose. Ûquĩ ño nandesaarõ arõ nguiã ã. Ae Dios chao mbae ja, ùquĩ abe riqui ùquĩ ndaarõ arõ ã. ²⁰Adán mbae icuã naa namo mose, mbae icuã ja que aquere cote ra. Dios chiao icuã ja cote. Dios que mbae mbiicuã ja Adán mbae icuã naa namo mose ra. ²¹Eĩ mbei eã nda mbae. Mbae ra nimbitorõ ja cote. Nimbiasu ra cote, Jesús tu mose íbii cote. Mbae ra manoã cote. Mbae ra shi eã cote. Jesús quiato rese ra mbae nyiicuabo ja aque mose cote. ²²Dios chiao ra nyiicuabo ja aque mose. Dios chiao ia eãte quia namo nde. Àquẽ ndasi rã ño eriqui nguiã namo. Nyebe ra Dios uchiao mbiasu ja cote. ²³Dios que Espiritu Turã mondo nande je ra. Nyebe nandeico nguiã ñee, “Dios ra nandembiasu nguiirina tuchi cote”, i. Aque mose ra Dios nandembuchiicuabo tuchi uchiao ja rese cote. Namu ño nanderasi rasi re. Nandeya eãte abe no. Nandembuchiicuabo mose, nanderete abe ra embiasu. ²⁴—Jendete tambiasu, i que Dios nanderirõ mose mbae icuã si ra. Ûquĩ ño nandesaarõ arõ nguiã ã. Nanderete yasue eãte namo. Nyebe nandeico nguiã eraarõ arõ ã. ²⁵—Jendete tambiasu, i que Dios nande je ra. Nyebe nandeico nguiã eraarõ arõ mingue ã.

²⁶Nandequirãcuã neate nande. Nyebe Espiritu Turã ndiqui tuchi nguiã nanderese. Sã nandeico ñee: “¿Mañi nande ra ñee Dios je re?” i nandechiangui re. Nandechẽ ndequia requia mose chõ nandeico nguiã iabu abu. Nandeiabu mose chõ Espiritu Turã ndiqui nguiã ñee turã Dios je nanderiĩ. Nandeuru ñee Dios je nandechiangui re. ²⁷Dios mbia chiã icua jate quia co. Espiritu Turã ñee mose Dios je nandeuru, Dios echeẽ icua

chõ nguiã aque. Dios cheẽ ndui si chõ Espíritu Turã ndiqui nguiã ñee Dios je Dios icuasa rĩ. ²⁸Ae nyesecua quia Dios rese, ũquĩ je chõ Dios riqui nguiã mbae turã naa ja. Dios quiatu ngue eirabo nguiã. Ndua quiatu ngue erese nyii re.

²⁹Ae res e Dios riqui nduate nyii nae, ũquĩ ngue Dios mingo icúe nyii ra. Jesucristo rã si embiasu sacua. Nyebe nandeico nguiã Dios riirĩ tuchi Jesucristo rese cote. Jesucristo rei nanderiqui cote. Nande tubiriãte ra Dios quiato cote. ³⁰Dios que ndua nanderese nyii ra. Aquere que nandemingo icúe umbaerã cote ra. Nandeisi turã ngue cote ra. —Mbia tamumae turã ja jendese jëingo mose ibate, i que Dios nande je cote ra.

Mbae mo nda nandembui eã mbei Dios si

³¹Dios riqui tuchi nanderese co resẽ. Nyebe ra emo ñimbirãcuã eã nande je cote. ³²Dios que nguiirĩ mii mondo nande je ra. Mano sacua nandeicuã je. Eĩ nda mbae mondo ja nande je no. Sã nguiirĩ mondo nande ja je no. ³³Dios chesecua tuchi chõ nande re. Emo ñee icuã aroneãte nande je. Dios quiatu ngue nandeisi turã nguiã. ³⁴Cristo que mano nandeicuã je ra. Quera si que ra. Dios quiatocuti eñi ngoi hue cote. Ñee turã turã nanderiĩ Dios je hue cote. Nyebe emo ndiqui nguiã ñee icuã aroneãte nande je cote. ³⁵Mbae mo Dios mbesarei aroneãte nandesi. Nyesecua beite quiatu nguiã nanderese co. Nanderasi arondete raque. Mbae nandembia eã arondete raque. Mbi a icuã arondete raque nande je. Nanderiãcuã arondete raque. Nandeirao eã arondete raque. Mbia nandeiquia arondete raque. Ũquĩ ja ra Dios mbesarei eã tuchi nandesi. ³⁶Mbia icuãte riqui nande je ã. Sã embesa ji riqui i no:

Nderiĩ ño mbia riqui nguiã ureiquia serĩ mbeite ã.

Oveja iquia iquia rã ño eriqui nguiã ure je ã, i ñi embesa ji re. ³⁷Mbia icuã icuãte raque nande je. Ñimbirãcuã eã mbei ra nande je. Jesucristo quia siqui nguiã nanderese co. Nyesecua beite quiatu nguiã nanderese co. ³⁸⁻³⁹Dios nyesecua tuchite quiatu nguiã nanderese co. Dios hui aroneãte nandesi. Mbia nandeiquia iquia mose, aque mose abe Dios hui aroneãte nandesi. Mbae mo nda embui eã nandesi. Angeles. Aba checuayã icuã. Mbia rerecua. Ae icuã icuã ndiqui nande je namo. Ae icuã icuã nda nande je emo mose. Ibatenda mo. Ae siqui ibiqui rĩ no. Dios chiao mo. Ũquĩ ja ra Dios mbui eã nandesi. Dios quia nyesecua tuchite nguiã nanderese Jesucristo rĩ co.

Dios que judíos mii icúe umbaerã tuchi ra

9 ¹Jesús icuasa chõ se resẽ. Aico ñee ñooño eãte co resẽ. Espíritu Turã abe riqui sembiirandu sechiangui re co resẽ. ²Seya eãte aico co. Seya eãte aico judíos rese co. ³Se sí raque judío. Judíos ja chõ ure re. Judíos siqui sereãte chõchĩ Jesús rese. Seso sete raque tata cuasu,

judíos mingo bei sacua Jesús rese. Eĩ ndei ra sesose rete tata cuasu judíos rendaque re. Seresenda tuchite quia ñene. ⁴Israel ndei judíos i tuchi. Seririĩ, i rei que Dios judíos je ra. Dios que uquirãcuã teacuquia rei judíos je ra. Dios que contrato saã ndei judíos je ra. Moisés chimbesa que judíos quereco rei ra. —Eĩ jenye chõ ñee seje, i rei que Dios judíos mbaaquiati quiatu ra. —Mbae turã nda asaã saã mbei quia jėje, i bei que Dios quia judíos je ra. ⁵Nanderamei ñiinda tuchi quiarei judíos i. Cristo tu mose ibi, judío que ae abe cote ra. Cristo rei Dios tuchi. Mbia rerecua bei tuchi rei Cristo. Amén.

⁶Dios turã tuchi raque judíos je. Judíos que siquiãte Dios rese cote ra. Dios quiatu que ucheẽ mbuchebiã ndei ee ra. Ūquĩ mo nguiatu que judíos tuchi eã nda. Siquiã tuchi que Dios rese ra. ⁷Abraham ndiirĩ nyeremo ndei que ra. Ismael. Isaac. Ūquĩ nyeremo ngue eriirĩ ja rei ra. Dios que Isaac miĩ isi ra. —Abraham ndiirĩ, i eã ngue Dios Ismael riirĩ je ra. —Abraham riirĩ, i chõ ngue Dios Isaac ndiirĩ je ra. Isaac ndiirĩ jaje que Dios “judíos” i cote ra. ⁸Abraham ndiirĩ nducucha que Dios isi turã ja eã ndese. Ae Dios cheẽ isi turã nguia, ūquĩ je chõ Dios riqui nguia “seririĩ” i. ⁹Dios que ñee Abraham je ra. —Tenda nongue ra achu. Aque mose ra ãquẽ nacui mo nyaacuquia neninisi Sara je, i que Dios Abraham je ra. ¹⁰Ãquẽ ngue tiarõ cote ra. Isaac, i que ee ra. Isaac que nguĩnisi tea chee ra. Rebeca, i que eninisi je ra. Eata riru rerequia mose que Dios ñee ee ra. ¹¹⁻¹²—Ae rane nda nyaacuquia ãquẽ, ngõngue rimba tuchi chõ nda aque, i que Dios Rebeca je ñee nda. Echaacuquia nonde. Eriirĩ mbae icuã naa nonde. Mbae turã abe naa nonde. —Co chõ taisi, i que Dios ra. —Co chõ taisi, i beite Dios quia co no. Mbia mbae turã naa nonde chõ Dios eirabo nguia. Dios turãte quia ñene. Nyebe mbia mo irabochõ nguia. Ebite quia ñene. ¹³Dios que ñee Rebeca riirĩ nii nda. Ūquĩ nyeremo nii:

Jacob ndese chõ aio nguia nyesecua.

Esau rese achesequa eãte, i que Dios ra,
i que embesa ji ra.

¹⁴¿Mbaerã Dios riqui aque miĩ irabo re? ¿Mbaerã eriqui enongue abe isiã nde? ¿Dios icuãte ere? Tei. Eicuã eãte raque. ¹⁵Sã Dios ñee Moisés je nyii no:

Seya eãse mose emo ndese, seya eãte erese.

Setutãse mose emo je, seturãte ee,

i que Dios Moisés je ra. ¹⁶—Dios turã naa nda seje chã, i mose emo, ūquĩ je eã ño Dios turã ndiqui nguia. Ae mbae turã saã saã ndei quia, ūquĩ je eã ño Dios turã ndiqui nguia. Ae rese Dios ia eã ndiqui, ūquĩ je quiatu Dios turã ndiqui nguia. ¹⁷Sã faraón no. Egipto jenda rerecua. Dios que ñee ee ra. —Aremiĩ ngue mbia rerecuarã nda. Sequirãcuã ndeacuquia sacua mbia je. Mbia jirandu ja sacua serese, i que Dios faraón je ra. ¹⁸Dios ia eãse mose emo ndese, eya eã nda erese. Dios emo ñia matãse mose, matã ndae.

Dios ra judíos isi turã sí

¹⁹Jemo nda ñee seje reae. —Dios ae emo ñiã mãtã mose, ¿mbaerã nda jeñee asi echĩã ãtã je re? i ra jemo ñee seje reae. ²⁰Dios cheë nandesobeishĩ aroneãte. Sã nandembaecua ñio ñee aroneãte uaosã je no. —¿Mbaerã seraã eĩ nde? i aroneãte ñio ñee uaosã je no. ²¹Ñio aosã ra ñio saã ñooño ño ubi mose no. Ñio turã tuchi raã arondete no. Ñio icuã abe raã arondete tuchu sique je no. Embae quia tuchu re. Tuchu rã ño nande re. Ñio aosã rã ño Dios re. ²²Ae eicuã icuã mbeite riqui Dios je nae, ùquĩ je Dios siqui mingue i ite co. Ûquĩ nda nyoĩ je tata cuasu. Ûquĩ Dios mbasi serĩte cote. ²³Dios mbae turã saã sete ubi je. Nyebe uquirãcuã ndeacuquia nguiã ubi je. Diobi chõ nande re. Dios que nandeao uchesequarã nda. Nandeico sacuã erese. ²⁴Diobi chõ nande re. Dios que nandeirabo ra. Nandemo ndei judíos. Judíos eã abe abe. Dios chiirabo ja chõ nande re. ²⁵Sã Oseas Dios cheë mbesa no:

Ae serimba eã nyii nae, ùquĩ nda serimbarã cote.

Ae rese mbia nyesequayã nyii, ùquĩ ndese ra achesequa tuchi se cote.

²⁶“Seresenda eã ño jẽ nde”, i que Dios ñee ee nyii ra.

Hue jenda sí je ra Dios ñee cote.

“Seresenda chõ jẽ cote re”, i ra Dios sí ñee ee cote,

i que Oseas Dios cheë mbesa ra.

²⁷Eĩ ngue Isaías Dios cheë mbesa cose ra:

Judíos tubiriã tuchite raque rae.

Siqui ja eã nda Dios rese.

Co miĩ miĩ ño nda siqui erese.

²⁸Dios quia ra uquiatoã mbasi ja ibi jenda cote.

Mbasi jei ra cote, i que Isaías embesa ra. ²⁹Isaías que ã mbesa cose no nda:

Mbia rese Dios ndua eande rae, eĩ nda judíos ua ja rei.

Dios judíos mo ndecha eande rae, eĩ nda judíos ua ja rei.

Sã Sodoma jenda ua ja no.

Gomorra jenda abe no,

i que Isaías embesa ra.

Judíos siqui sereã Jesús rese

³⁰Tacheë nyecua jẽje. Ae judíos eã nae, ùquĩ ngue “taico Dios rese”, iã ndei ra. Aque mose que Jesús icua cote ra. Jesús icua mose que Dios echĩã mbitirõ cote ra. ³¹Judíos quiatu que ñee ndei ra. —Dios cheë ndui si tuchi nandeico. Nandeico mose erui, Dios ra nandemingo bei, i rei que judíos ra. Dios que emingo bei eã nda. Siqui bei eã nguiatu ngue Dios cheë ndese re. ³²—Jesucristo nandeicua, i eã ñochĩ judíos. —Nande ae nandeico Dios cheë ndui, i chõchĩ. —Nandeico mose erui, Dios ra

nandemingo bei, i chōchĩ. Judíos biâte que Jesús riqui ra. Nyebe judíos riqui turã eãte nguia. ³³Eĩ ngue embesa ji Dios cheẽ nda:

Serucucha que amii judíos rae ra.

Judíos ra eisiteã.

Judíos ra cuá i nyoí ee.

Ngoí ra echoí cuá i mose ee.

Sita rã ño serucucha ee re.

Ae serucucha icua quia nae, ùquĩ nguia ra ngoí eã nyoí.

“Dios rucucha aisi jirichĩ nguia no”, i eã nda Cristo icuasa mo ñee, i que Dios cheẽ mbesa ji ra.

10 ¹—Sã Dios judíos rirõ mbae icuã si, ae rei quia co. —Paba, judíos emingo Jesucristo rese, ae tuchi rei quia co. ²Judíos siqui sete raque Dios cheẽ ndui. Ñeenda quia eicuayãte nguia Dios icha. ³—Dios ra nandechiã mbitirõ Jesucristo riĩ, i eã ñochĩ. Ae ae uchiã mbitirõse chōchĩ. Jesucristo icua sereã nea mbei chōchĩ. Nyebe Dios riqui nguia echiã mbitirõ eã mbei. ⁴Jesucristo tu nonde que judíos siquise tuchi Moisés chimbese rese ra. Jesús que tu íbii cote ra. —Moisés chimbese rui jëingo mose, taembitirõ turã, i áte que Jesús ra. —Seicua mose quiatu ra jaembitirõ, i que ra.

Sã mbia siqui ja serese, i Dios

⁵—Emo mbae icuã mo saã eã mbei emo mose, ùquĩ nda Dios mingo bei, i rei que Moisés ra. ⁶⁻⁷Á nandeico Jesús icuate ã. Nyebe ae riqui nguia nandemingo bei i ite ã. Nyebe nandeico nguia ñee áte. —Aba quia ra oso Jesús reru ibate si nande je, i áte. —Aba quia ra oso mbia raaque rea, Jesús mbuquera sacua, i áte nande mo. ⁸Á ureico Jesucristo renei nenei mbia je ã. —Jë Jesucristo icua mose, jëingo bei rae, ure equia mbia je ã. Jesucristo icuasa ra ñee: —A Jesucristo cheẽ ndiqui aba jiite a. Echeẽ aba chiicua bite aba chianguí re, i ra Jesucristo icuasa ñee. ⁹—Jesucristo rei sererecua, ere chō ñee. —Dios que Jesucristo raaque mbuquera ra, ere chō nguia ndechianguí re. Nde i mose, Dios ra nemingo bei. ¹⁰Emo Jesucristo icua mose uchianguí re, Dios ra echiã mbitirõ. —Jesucristo aicua quia co, i mose, Dios ra esirõ mbae icuã si. ¹¹—Jesucristo aisi jirichĩ nguia no, i eã nda Jesús icuasa mo ñee, i que embesa ji Dios cheẽ nda. ¹²Dios quia mbia ja rerecua tuchi re. Judíos achō ndeerecua eã. Judíos eã achō nderecua eã no. Eĩ ja chō mbia Dios je re. —Mbae mo embu seje, i mose emo Dios je, mondo turã tuchi ra ee. ¹³Sã embesa ji riqui i no:

“Paba, seicua embitorõ”, i mose emo, Dios ra ùquĩ mingo bei tuchi, i que embesa ji ra. ¹⁴Mbia mo Jesús icuayã mose, ñee aroneãte ee. Mbia jiranuã mose Jesús rese, Jesús icua aroneãte. Emo Jesús cheẽ nenei nenei eã mose mbia je, mbia jirandu aroneãte Jesús rese. ¹⁵Dios mbia mo

mondo eã mose echeẽ nenei nenei sacuã, echeẽ nenei nenei aroneãte. Sã embesa ji riqui ñee no. Eĩ si chõ ñene:

Aba bite emo tu mose Dios cheẽ nenei nenei ure je.

Ureya tuchite erese,

i que embesa ji cose ra. ¹⁶Mbia mii mii ño siquichĩ Dios cheẽ turã ndese ùquĩ. Sã Isaías ñee no:

Dios, mbia que urecheẽ ñandu sereãte ra,

i que Isaías embesa ra. ¹⁷Mbia ra Jesucristo icuayã mbeite, jiranuã mose erese. Mbia ra jiranuãte Jesucristo rese, emo echeẽ nenei neneiã mose ee.

¹⁸¿Judíos Dios cheẽ turã ñanuãte re? Ñandu ja rei que ra. Dios cheẽ ngue judíos chandu ja rei resẽ. Mangue choño eã ngue echoi Dios cheẽ nenei nenei ndesẽ. ¹⁹¿Judíos jiranuãte Jesús cheẽ turã ndese re? Jirandu tuchite rei que ra. Sã Moisés Dios cheẽ mbesa no:

Dios rei se. Judíos eã ndese taico turã.

Mbia aquiatuã taisi serimbarã. Judíos nda queteã tuchi serese chã, i que Moisés Dios cheẽ mbesa ra. ²⁰Isaías abe que Dios cheẽ mbesa ra. Ña ngue embesa ra:

Ae serequia eãte quia, ùquĩ ño ngue serea ra.

Ae ndua eãte quia serese, ùquĩ je chõ achecua nguiã, i que Dios ra, i que Isaías siquicheãte Dios cheẽ mbesa ra. ²¹Isaías que ñee judíos je no nda:

Dios riqui ñee jẽje co. “Jẽingo serese”, ae beite raque se quia judíos je co.

Secheẽ mumba bei chõchĩ.

“Jẽingo serese”, ae beite raque quia secheẽ mumbasa je co, i que Dios ra, i que Isaías Dios cheẽ mbesa ra.

Dios ia eãte judíos rese

11 ¹Dios que hui eã judíos si ra. Judío chõ se no nde. Abraham ndei sei. Benjamín abe rei sei no. ¿Mañĩ nda Dios hui judíos si re? ²—Serimbarã mbei ra judíos, i que Dios cose ra. Nyebe eriqui nguiã emombo eã mbei. ¿Jêtesarei chõ Elías cheẽ si Dios je re? Elías que ñee icuãte judíos ataque riĩ aque mose ra. ³—Dios, judíos que ndecheẽ nenei neneisa iquia ja ra. Altar abe que embucoi coi nembae ra. Se ae tuchi aico nderimba co cote. Se abe ra judíos seiquia chee, i rei que Elías Dios je ra. ⁴Dios que ñee Elías je cote ra. —Nde mii eã ño serimba re. Serimba tubiriãte nyeresẽ. Siete mi l serimba que ngoi eãte nguiã ndese ñee ñee Baal naanguia je ra, i que Dios ñee Elías je cose ra. ⁵Eĩ ño namo abe re. Judíos emo emo ño siqui nguiã Dios rese ã. Ùquĩ mii ño Dios chiirabo ùquĩ nde. Uturã je chõ Dios ùquĩ irabo nguiã. ⁶Mbae turã naa mose eã ño Dios eirabo nguiã. Uturã je ae chõ Dios eirabo nguiã. Mbae turã naa naa ndibishorõ eã ño Dios riqui nguiã aba irabo umbaerã. Mbae turã naa naa

ndibishorõ mose, eĩ nda Dios aba irabo eãte rei uturã je. ⁷Dios quiatorã nande, i rei que judíos ra. Dios quiatoã tuchi que eriqui ra. Jesucristo icua sereãte que equia ra. Co mii mii ño ngue Dios irabo uquiatorã nda. Eataque que Jesucristo icua sereãte quia ra. ⁸Sã embesa ji riqui ñee no:

Dios que embaaracua eã nda.

Nyebe mbae icua eãte nguiã, mae mose Dios chiao rese.

Nyebe Dios cheẽ icua eãte nguiã eandu mose no,

i que embesa ji cose ra. Eĩ mbei chõ namo abe re. ⁹David abe que ucheẽ mbesa ra. Eĩ ngue embesa ra:

Sã eya chooño umbae tubiriã ndese.

“Nandeico turãte ã”, sã i, siqui icuã mose.

Sã Dios embua tuchi embasi mose.

¹⁰Sã eresa nyiati ati bei.

Mae eã sacuã.

Sã mbae usi riqui eituquia bei,

i que David ñee nda.

¹¹Judíos que Dios cheẽ secha rei ra. Uba je quia ra ecuaẽ Dios rese.

Dios si judíos hui mose quiatu que judíos eã siqui arõte Dios rese cote ra.

Dios judíos eã mingo bei tuchi sacuã cote. Judíos ra queteã tuchi chee

Dios rese cote. Uba si sacuã erese cote. ¹²Judíos que Dios cheẽ isiteã nda.

Nyebe mbia judíos eã ja Dios cheẽ andu ja nguiã cote. Judíos Dios cheẽ

mumba mose, Dios que uturã teacuquia ja mbia mangue chooñoa jenda ja

je cote ra. Judíos uba si mose Dios rese, mbia mangue chooñoa jenda ra

siqui tuchi Dios rese cote.

Judíos eã ño Dios cheẽ isi

¹³Jẽje judíos eã je aico Dios cheẽ nenei nenei a. —Judíos eã je eico

secheẽ nenei nenei, i que Dios semondo ra. Nyebe aico nguiã Dios cheẽ

nenei nenei sete. ¹⁴Judío chõ se no nde. Sã jẽ jẽingo Dios rese no jẽ. Sã

judíos abe riqui Dios rese jẽ na si. Dios erirõ sacuã mbae icuã si. ¹⁵Judíos

Dios isiteã mose que Dios hui chõ judíos si ra. Judíos eã nguiatu que Dios

isi uquiatorã cote ra. —Mbia mo ja sequiatorã cote, i que Dios judíos

eisiteã mose ra. Judíos ra uba si chee Dios rese emo mose cote. Mbia

raaque quera si rã tuchi ra aque mose cote. ¹⁶Sã mbia mo mbichae rã

no. Mbichae ñiinda uchi turã mose, eruinda abe ra uchi turã no. Mbichae

ñiinda rã ño Abraham nde. Judío i tuchi chõ Abraham nde. Sã Abraham

siqui turã tuchi Dios je no. Nyebe ra eriri abe uba chee Dios rese no. Ei

turã mose, erãquiã abe ra eturã no.

¹⁷Olivo rãquiã na ño judíos re. Judíos siquiã mose Dios rese, olivo

rãquiã na ño ngue Dios echisia mombo ra. Ũquiã naquiã nendaque re chõ

ngue Dios jemii nda. Jẽ judíos eã. Injertar i raanguia chõ Dios jembucha

nguiã ei rese. Jemingo tuchi sacuã Dios rese. Olivo rãquiã na eã ndaque

jě. ¹⁸ ¡Jenguasu ra jěsaã saãchĩ judíos je jě! ¡Dios jěisi turã mose jě! Erãquiã injertar i ji rã achõ ño jě nde. Erãquiã nda hui mingo eã. Ei quia nda erãquiã mingo nguiã. Erãquiã na ño jěingo nguiã jě. ¹⁹—Olivo rãquiã ngue Dios chisia urembucha sacuaẽ ei rese, ¡jenyechĩ nda jenguasu raã naa jě! ²⁰ Dios que echisia sia Jesucristo icua sereã mose ra. Jě Jesucristo icua mose chõ ngue Dios jembucha olivo i rese ra. Jemingo bei sacuaẽ. Nyebe jěingo jenguasu raã naa eã. Jěireĩ ireĩ jiri quia Dios si. ²¹ Dios que olivo rãquiã nyisia mombo Jesús icuayã mos e ra. Eĩ nda Dios jemombo jě abe Jesús icuayã mose. ²² ¡Sã Dios turãte mbia siqui mose eruĩ no jě! ¡Sã mbia mbasi echeẽ mumba mose no jě! ¡Sã eturãte jěje no jě! ¡Jěingo bei chõ Dios turã ndese jě! Jěingo eã mose Dios rui, Dios ra jemombo. Ira rãquiã sia ji mombo rã si. ²³ Judíos uba si mose Dios rese, Dios ra embucha si esiasa rese. Injertar i si ra ee. Dios miĩ ño eaquiatsu ũquĩ naa nde. ²⁴ Judíos eã ño jě nde. Olivos turã naquiã eã ño jě nde. Olivo mbuae rãquiã na ño jě nde. Dios ae que jembucha nguiã olivo i rese. Injertar i jěje. Ae Dios nyisia nyii nae, ũquĩ nda Dios mbucha si uchisia rese.

Judíos abe ra siqui chee Jesús rese

²⁵ Tacheẽ nyecuayã na jěisaa. Mbia chiicuayã tasenei na jěje. Jenguasu raã naa sacuaẽ eã judíos je. Judíos yete tuchĩ que hui rei Dios si ra. Judíos eã nguiã siqui tuchĩ Dios icua ã cote. Judíos eã Dios chiirabo Jesús icua ja mose, judíos abe ra uba ja erese cote. ²⁶ Aque mose ra Dios judíos rirõ ja huiicuã si cote. Sã embesa ji riqui i no:

Mbia mbuturãsa ra tu Sion si.

Ae ra Jacob ririĩ sirõ ja huiicuã si. Judíos rirõ ja huiicuã si.

²⁷ Aque mose ra judíos icua ambutiã ja esi.

Secheẽ nda ique aque mose cote, i que Dios ra, i que embesa ji ra. ²⁸ Judíos yete tuchĩ chõ Jesús cheẽ turã ucuayã nguiã ũquĩ. Nyebe Dios uturã ndeacuquia nguiã jěje. Judíos eã je. Dios quia nyesecua beite nguiã judíos rese. Irabo que nyii ra. Eramei ja riĩ ño Dios judíos irabo nguiã. ²⁹—Mbae mo tamee jěje, i mose Dios, mondo rae. Dios ra uchimondo sirombe eã. Dios ra hui eã mbei uchiirabo si. ³⁰ Jesucristo que jěicuayãte quia nyii ra. Judíos hui mose Dios si, Dios que uturã teacuquia jěje cote resẽ. ³¹ Judíos quia Jesucristo icuayãte nguiã cote. Sã Dios ia eãte riqui jendese no, eĩ si ra eya eãte judíos rese cote. Uturã nda eteacuquiabe chee judíos je. ³² Eĩ ja chõ mbia Dios je re. Emo ngue echeẽ mumbayã eãte quia ra. Nyebe eya eãte riqui nguiã nande ja rese.

³³ Dios turã tuchite. Dios aracua tuchite. —¿Mbaerã Dios ũquĩ naa nde? nande aroneate. Dios chisaã nandeicua aroneãte quia ã. ³⁴ ¿Emo ndua ndua quia Dios rã nde? ¿Emo mose mbia riqui Dios mbaaquiatsu re? ³⁵ ¿Emo nane mbae mo mondo quia Dios je re? ¿Dios mbae mondo nonde

re? ³⁶Dios ae que mbae chao ja ra. Umbaerã ño echao ja nguiã mbae. Ae quia ecuasu jiri mbae ja si re. Nandechẽ turã mbei ra equia eriĩ. Amén.

Je sí chõ jeñimondo Dios je

12 ¹Dios ia eã mbeite riqui nanderese co. Nyebe jẽ sí chõ jeñimee Dios je. Jendeco chõ jemee Dios je. Jeñia turã jemee Dios je. Ebite ùquĩ. Dios que mbae mondo tuchi nande je ra. Eĩ nande chõ ñimondo ee ae. ²iJesús quiatoã na nda jẽingochĩ jẽ! —Nde rã si semundua ndua ramo, Paba, jenyẽ chõ nguia Dios je. Eĩ jenyẽ mose ra Dios ñeenda huiicha teacuquia jẽje. —Eĩ jenyẽ, eĩ jenyẽ chõ, i bei ra Dios quia jẽje cote.

³Dios turã ngue seirabo ucheẽ nenei nenei sacua jẽje ra. Nyebe aico nguiã jembirandu randu co. —Se jiri quia mbia si re, ijenyẽ tuchite chĩ na jẽ! iEndua ndua turã ño ndechue jẽ! Dios nembaaquiato tuchi mose, ebite quia nde re. ⁴⁻⁵Mbae tubiriãte nanderete rese. Nanderesa. Nandeo. Nandeisa. Ùquĩ jate nanderete rese. Mbae miĩ nda siquã nanderete rese. Nandeo oco mbae rese. Nandeisa mbae andu. Nanderesa mae mbae rese. Nandechuru ñee. Nanderete quiarei “ã nandesã”, i tuchi nyue. Eĩ si chõ Jesús icuasa nande re. Jesús rete ja chõ nande re. “Ã nandesã”, nandete equia nandechue ã. Mbae rese jaajate que Dios uquiato mingo ra. ⁶Dios turã tuchi que nande je ra. —Co rese eico nde. ã ndese eico nde, i Dios quia nandembuchao chao co. Ùquĩ naa sacua Dios riqui uquirãcuã mee mee nande je co. —Secheẽ esenei senei, i mose Dios emo je, sã aque echeẽ nenei nenei turã echeẽ ndui si. ⁷—Mbae turã esaã saã mbia je, i mose Dios emo je, sã aque mbae turã naa naa mbei mbia je. —Mbia embaaquiato quiato, i mose Dios emo je, sã embaaquiato turã tuchi. ⁸—Seosei uquia mbia je, i mose Dios emo je, sã aque Dios osei uquia turã tuchi mbia je. —Mbae emee mee mbia je, i mose Dios emo je, sã aque abei tuchi. Sã ngueteã eã tuchi mbae rese ee. Dios emo miĩ mose ererecuarã, sã ererecua turã tuchi aque. —Mbaecha reã je mbae esaã saã, Dios i mose emo je, sã aque ia tuchi mbae turã naa naa mbaecha reã je.

⁹iJenyesequa chooñoichĩ nda jenyiese jẽ! iMbae icuã si jenyicusãse cuasẽ tuchi quiato jẽ! iMbae turã ndese chõ jẽingo tuchi jẽ! ¹⁰iJembi turã ño jenyiese jẽ! iJenongue rã nguiato jẽingo turã tuchi jenyue jẽ! iJeñee turã turã ño nguia emo niĩ jẽ! iNderiĩ nda erecheẽ turã turãchĩ jẽ! ¹¹iJeñimbutomo tomochĩ nda jẽ! iJeñimbirãtã tuchi quiato Dios je jẽ! ¹²Jesucristo cheẽ nda io chee nande je emo mose cote. Ùquĩ ño nandesarõ arõ nguiã ã. Nyebe jëya tuchi quiato siqui eraarõ arõ. Mbia jembasi mbasi mose, jenyecuachõ ño nguia ee. Jeñee ñee mbei quiato quia Dios je. ¹³Mbae eã mose Jesús quiato je, mbae mo jemondo ee. Mbia mo oso mose jenyuchúaa, ijëisi turã ño jẽ!

¹⁴Mbia mo icuã icuã mose jẽje, ijëturã ño ee jẽ! —Paba, mbae turã emondo rã ee. Ae icuãte riqui seje, ùquĩ je, jenyẽ chõ Dios je. ¹⁵Ae eyate

riqui, ũquĩ ndese chõ jěya jě abe. Ae nyeseo quia, ũquĩ je ndese abe jenyeseo no. ¹⁶Hue rĩ ja chõ jěingo ndua turã. iJenguasu ra jěsaã saãchĩ emo je jě! iJěsetea ño jěingo jě! iJěaquiatu ra jěsaã saãchĩ jě! ¹⁷Mbia mo icuã icuã mose jěje, jenyecuachõ ño nguia ee. Mbae turã ño jěsaã nguia mbia resa rae. ¹⁸iJěingo turã ño mbia je jě! Ĩ nda jěingo ubi turã jenyiese. ¹⁹Mbia icuã mose jěje, ijeñee icuãchĩ nda erobeishĩ jě! Dios quia ra embasi nguia eicuã mose. Sã embesa ji riqui i no:

Se quia mbia tambasi eicuã mose, i que Dios ra, i que embesa ji ra. ²⁰Ae eicuãt e riqui jěje, ũquĩ jembuquiaru chõ eriãcuã mose. Ũquĩ jembu chõ eisei mose. Eĩ jenye mose ee, eireĩ te ra huiicuã mose cote. ²¹Mbia icuã mose jěje, jeñeechĩ nda echeẽ ndibishorõ. Jěingo turã ño ee. Mbae turã nguia equiracuã jiri mbae icuã si re. Mbae icuã mombo jiri.

Sã mbia riqui turã ererecua ja je

13 ¹Mbia ja ererecua cheẽ mumbayã nguia. Dios ae chõ ererecua miĩ nguia. Dios chimii ja chõ mbia rerecua re. ²Ae mbia rerecua cheẽ mumba quia, Dios cheẽ abe mumba chõ nguia aque. Dios quia emii tare nguia. Ae ererecua cheẽ mumba mumba quia, ũquĩ nda mbae rasi saã cote. ³Mbia turã mbusiquiche sacua eã ño ererecua re. Mbia icuã mbusiquiche sacua nguia ñene. Nde ndeico turã mose, ererecua ra nembusiquiche eã. Ndeico turã mose, ererecua ra ñee turã mbei ndeje. ⁴Dios ae chõ ererecua miĩ nguia. Nanderaquiatu turã sacua. Nde mbae icuã naa mose, ndesiquiche jiri nda esi chã. Ndeicuã mose ra ndeiruã nua arõte. Dios quiatu emii nguia ererecuarã mbia icuã mbasi mbasi sacua. ⁵Ererecua cheẽ nandemumbayã ño nguia. Nandembaasi asiã sacua achõ eã ño ñene. Nandendua turã sacua abe chõ ñene. ⁶—Impuestos jěisi isi mbia si, i que Dios ererecua miĩ nda. Nyebe nandeico nguia impuestos mondo mondo turã ererecua je. Dio s cheẽ nguire chõ ererecua riqui nguia eisi isi. ⁷Jě deber i mose emo je, mbae jembuchebi jei chõ ee. Jě deber i mose impuestos, jemondo chõ ee. Ererecua je jěingo turã ño. Jeñee turã ño eriĩ.

Jenyeseo quia quia jenyiese

⁸Emo mbae mondo mose jěje, jěingo are arete chĩ nguia mbae mondo rocoĩ ee. Deber jenyechĩ nda emo je. iJenyeseo quia quia jenyiese jě! Jenyeseo quia mose mbia rese, Moisés chimbasa ja jemumbayã ño nguia ũquĩ. ⁹Á ndei Moisés chimbasa ã:

Emo ninisi rese ra ereicochĩ.

Mbia mo nda ereiquiachĩ.

Mbae mo nda erembuquiachãchĩ.

Emo je ra erecheẽ ñoñochoĩ.

Emo mbae ra erechosei choseichĩ,
 i que Moisés chimbese ra. Nandechesequa mose mbia rese, nandeico
 embesa ji cheẽ mumbayã ã. Ñ ndei Jesucristo cheẽ ã: Sã ereico nyesequa
 nderete rese no, eĩ ere si chõ nyesequa emo ndese. Nde ã naa mose,
 Moisés chimbese ja eremumbayã nguia ã. ¹⁰Ae nyesequa quia mbia rese,
 ùquĩ nda mbae icuã saã eã mbei emo je. Emo nyesequa mose mbia rese,
 Dios cheẽ ndui si chõ eriqui nguia mbae turã naa naa ùquĩ.

¹¹Dios rese jẽingo tuchi ùquĩ. Nandemae jei ra Jesucristo rese cote.
 Nandechẽ ngue equia nyii. —Nandemae je ra Jesucristo rese, nande
 que equia nyii. Namu nda nandemae erese cote. Aichite eñi tu a cote.
¹²Itondaru rã ño mbae icuã ja namu nde. Jesucristo ra tu mbae mbuturã
 cote. Nyaashĩ na nda cote. Nyebe nandeico bei rã mbae turã ndese cote.
 Dios rese nandeico tuchi rã cote. Mbae icuã ndiquisã sacua nandesĩ.
¹³Nandeico turã ño Dios resa rae. iMbia quiacua ra nandesĩchãchĩ jẽ!
 iNandequiacuachĩ nda jẽ! iEmo ninisi rese ra nandeico icochĩ jẽ! iMbae
 icuã nda nandechosei choseichĩ je! iNandecuã icuachĩ nda emo mbiicuã
 icuã jẽ! iEmo mbae ra nandechosei choseichĩ jẽ! ¹⁴Jeñimee tuchi quia
 Jesucristo je. Ae nda uquiracuã mee tuchi jẽje chã. Mbae icuã ndiquisã
 sacua jẽsi. Ae icuã mbia chosei chosei quia nae, ùquĩ nda jẽsaã saachĩ jẽ
 Jesús resenda chõ jẽ ndesẽ.

Jeñee asiã mbei jenongue je

14 ¹Jesús quiato mo Jesús icua tuchiã mose, jẽisi turã ño. Jeñee asi
 asichĩ nda ee. ²Emo emo mbae u ja. Emo emo soo u eã tuchi no.
 Ae soo u eãte quia nae, embaaquiatu tuchi iriã ño ùquĩ nde. ³Ae soo u
 guia nae, sã ùquĩ ñee asiã mbei soocua reã je. Ae soo u eãte guia nae, sã
 ùquĩ ñee asiã mbei soocua je no. Dios quiato ja chõ ñene. ⁴Erecheẽ icuã
 aroneãte ererequa rimba mo je. Ae ae mbae saã nguia nguerequa je. Dios
 ae nda ñee nguia nguimba je. Mbae raã turã mose. Mbae raã icuã mose
 abe no. Dios quiracuã ae nda nguimba mingo nguia mbae turã ndese.
⁵—Nyaashĩ mo ngue Dios irabo mbiicúe cose ra. Ùquĩ nyaashĩ mose
 nandechimbaacua rã, i Jesús quiato mo nguia co. Jesús quiato mo nguia
 ñee nguia: —Eĩ ja chõ nyaashĩ ndesẽ, i emo no. Sã Dios quiato ja ae
 riqui ndua ndua uchiangui re ae. ⁶Dios quiato mo ñimbaacua mose aque
 nyaashĩ mose, Dios je chõ eriqui nguia ñimbaacua. Dios quiato mo mbae
 raã naa mose aque nyaashĩ mose, Jesús je chõ eriqui nguia mbae raã naa
 aque nyaashĩ mose. Ae soo u quia, Dios je chõ eriqui nguia soo u. Gracias,
 i que Dios je nyii ra. Ae soo u eã nguia, Dios je chõ eriqui nguia soo u eã
 no. Ae abe gracias i chõ nguia Dios je ague. ⁷—Sebi rese chõ taico bei,
 nande aroneãte. —Semanose mose quia tamano, nande aroneãte. ⁸Dios
 ae chõ nandereco mingo nguia. “Emano”, i mose Dios nande je, nandeico
 nguia mano. Nandereco siqui mose, Dios rimbarã ño ñene. Nandemano

mose, Dios rimbarã ño nda nandeico nguiã no. ⁹Cristo que mano nda. Quera si que ra. Mbia rerecuarã ngue quera si ra. Mbia reco rerecuarã. Mbia mano je rerecuarã abe no.

¹⁰Nandechẽ icuã icuã aroneãte nanderesenda mo je. Emo mose quia ra Dios mae tuchi nanderese cote. Nandechiangui renda ra etea tuchi cote. Ae quia nda nandeicuã tea nguiã. Nandeturã abe rea. ¹¹Ã ndei embesa j i ã:

Dios ndei se. Se rei sereco bei.

Sésaa ra mbia chi ja ngoi ngúã ndese.

Ñee jaaja ra seje cote.

“Dios tuchi chõ nde re”, i jaaja ra seje cote, i que Dios ra, i que embesa ji ra. ¹²Nande ae ae ra mbae nandesenei senei Dios je aque mose. —Ã ngue asaã saã nguia seico mose íbii ra, nande ja ja ra ee cote.

Jenongue jembicuã eã

¹³Nyebe nandechẽ icuã eã nguia nanderesenda mo nii. iNandembia eãte chĩ nda jẽ! iMbae icuã nda nandesaa uquiachĩ ee jẽ! ¹⁴Jesucristo que sembaaquiato ra. —Mbae turã ja chõ mbia chiurã nde, i que ra. —iCo ra jẽuchĩ jẽ! iãte Dios mbae mo nii. —Eicuãte co, i mose emo, sã ae miĩ eu eã. Ae eu mose, eicuãte ee. ¹⁵—iCo nandeu eã jẽ! Eicuãte, i mose nderesenda mo ndeje, eu eã. Nde eu mose, erchesequa eã ño nguiã nderesenda rese aque. Nderesenda je abe chõ ngue Jesucristo mano ndesẽ. ¿Mbaerã nda nderesenda erembicuã ndechuubi je re? ¹⁶Ndechuubi turã ndaque ndeje. “Eicuãte” i mose nderesenda mo, eu eã ae. Nde eu mose, mbia ra erembucheẽ icuã ndechue. ¹⁷Dios chõ nandererequa cote re. Nyebe nandendua tuchi eã nguia nandechiurã ndese. Ae nandembei quia, ùquĩ abe rese. Dios rese quia nandendua. Ae chõ nandemingo nguiã mbae turã ndese co. Ae chõ nandechiã mbucoi nguiã co. Espíritu turã ae nandembia mingo nguiã co. ¹⁸Eĩ nande mose Cristo je, Dios ia tuchi ra nanderese. Mbia abe ia ra nanderese. ¹⁹Nandeico turã nda nandechue chã. Eĩ nande nda Jesús osei osei uquia nandechue chã. ²⁰—iAque soo ra nandechĩ jẽ! i mose Jesús quiato mo, iereuchĩ nda jẽ! Jesús quiato ra erembicuã arõte nde eu mose. Mbae turã ja raque mbia chiũ. “Eicuãte”, i mose Jesús quiato mo, eu eã ae. ²¹Soo Jesús quiato mbicuã mose, soo ra nandeu eã. Vino Jesús quiato mbicuã mose, vino nda nandembei eã. Mbae mo Jesús quiato mo mbicuã mose, nandeoco eã erese nande abe. Mbae mo Jesús quiato mo mbicha serĩ mose Dios icha si, ùquĩ ndese nandeicoã nande. Eĩ nda ichayã esi. ²²—So o icuã eã ño ñene, i mose Dios ndeje, echecuachõ ño nguia eu. Endua tuchi mbae mo naa nonde. Eicuã arõ mose ndeje, esaã eã. Eturã mose ndeje, echecuachõ ño eraã. Nde ùquĩ naa naa mose, ndeya tuchi rae. ²³Nde ndeiranaũ mose mbae mo ndese, esaã eã. —Eturãte ereae. Eicuãte

ere no ae, nde i mose eriisu isu, esaã eã ño. Ndeiranuã eraã ñooño mose, eicuãte ùquĩ. Ndechiisu isu u mose soo, eicuãte ùquĩ. —Eicuãte ereae, nde i mose, ereicohĩ nguiã eu.

Nandebi rese ra nandeicohĩ jẽ; nandenongue bi rese quia nandeico

15 ¹Nande mo Jesús icuat e quia co. Ae Jesús icua tuchiãte quia nae, ùquĩ je nandeico turã jiri ae. Nandembaaquiatu quiatu ae. Nandebi achõ ndese ra nandendua eã. ²Ae nandebite nande ae, ùquĩ ndese nandeicoã. Ae Jesús quiato nongue bite nae, ùquĩ ndese quia nandeico. Ùquĩ mose nandeico nanderesenda mbaaquiatu tuchi Jesús riĩ co. ³Cristo chee que siquiã ubi rese ra. Sã embesa ji riqui ñee Cristo riĩ no: Paba, ae ndeucuyãte quia nae, ùquĩ ngue ñee icuã mbeite quia seje ra, i que Cristo ñee ngu je ra, i que embesa ji ra. ⁴Dios cheẽ mbesa ji cose ndare chõ nandembaaquiatusa re. Nandemingo mingue sacua. Nandembirãcuã sacua Jesucristo riĩ. Nyebe nandeico nguiã Jesucristo raarõ arõ minguetã. ⁵Dios chõ nandemingo mingue nguiã. Dios chõ nandembirãcuã nguiã. Dios nda jemingo turã mbei nyiese Jesucristo cheẽ ndui si chã. ⁶Ùquĩ mose ra jẽingo ñee turã mbei Dios je. Hue rĩ ja ra jẽingo ndua turã Dios rese. Dios quia Jesucristo ru re.

Dios iate judíos eã ndese

⁷Sã Cristo nandehi turã no, eĩ jeyẽ si chõ nguiã nyiisi turã. Eĩ nda mbia ñee turã Dios riĩ. ⁸—Eĩ tae tae, i que Dios judíos i ñiinda ja je cose ra. Nyebe Cristo ru nguiã mbae turã naa naa judíos je cote. —Dios cheẽ iochĩ cote, i nda judíos chã. ⁹Judíos eã abe mundua sacua Dios rese que Cristo ru ra. Dios turã ndese emundua sacua ño ngue eru nguiã. Co rei David chimbesa co:

Paba, ndeturã tasenei senei judíos eã je.

Tairasei rasei abe ndeje,

i que David embesa ra. ¹⁰Co rei embesa ji cheẽ mo co:

Judíos eã, jẽya chõ Dios rese.

Sã Dios rimba iate erese no, eĩ jeyẽ chõ jẽ abe jẽya erese, i que embesa ji ñee nda. ¹¹Co rei embesa ji cheẽ mo co no:

Sã mbia ibi jenda ja ñee turã ja Dios riĩ,

i que embesa ji ra. ¹²Isaías que co mbesa ra:

Isaí riirĩ nguiã ra mbia judíos eã nderecuarã tuchi cote.

Mbia judíos eã nda “ichõĩñosa reã”, i tuchi ee,

i que Isaías embesa Jesús riĩ nda. ¹³Ùquĩ jẽingo Dios icuate ùquĩ. Dios nda jembia tuchi mingo chã. Dios nda jeñia mbucoi chã. Dios ae chõ “Cristo jësaarõ arõ”, i chõ nguiã nandemingo mingue ã. Espiritu Turã ndiqu i nandembirãcuã tuchi ã. Nandembia mingo Cristo raarõ arõ ã.

¹⁴Seyate aico jendese co, Seresenda. Jëingo turâte quia jenyiese ùquĩ. Mbae jëicua tuchite cote. Jë ae jëingo nĩmbaaquiato quiatu turã jenyue ùquĩ. ¹⁵Aireĩ ireĩ ãte ã mbesa jëje, Seresenda. Jëtesareiã sacua ã si. Dios turã ae ngue seirabo nguiã. Mbia mbesarei eã sacua Jesús cheẽ si. ¹⁶Dios que seirabo Jesucristo rimbarã nda. Ucheẽ nenei nenei sacua mbia judíos eã je. Mbia judíos eã secheẽ isi turã mose, Espíritu Turã nda emingo icúe Dios mbaerã cote. Ûquĩ mose ra Dios judíos eã isi turã cote. ¹⁷Se Dios cheẽ nenei nenei mose mbia je, mbia que siqui tuchi erese secheẽ nguire ra. Nyebe ùquĩ ndiqui nguiã sembia tuchi. ¹⁸Jesucristo que sembirãcuã nda. Ucheẽ nenei nenei sacua judíos eã je. Nyebe judíos eã ndiqui nguiã siqui tuchi Dios rese cote. Secheẽ nguire cote. Sechisaã ndese abe maende cote. Mbae mo nii abe ra acheẽ iã cote. Jesucristo que sembirãcuã, ùquĩ mii ño aico nguiã ñee jëje a. ¹⁹Espíritu Turã ngue uquirãcuã mee seje ra. Nyebe aico nguiã mbia mae sayã naa naa tuchi mbia je. Ûquĩ mos e que mbia riqui tuchi Dios rese cote ra. Jesucristo cheẽ ngue asenei senei Jerusalén nda. Mbia mangue chooñoa jenda je abe. Ilfírico jenda je abe. ²⁰—Ae mbia riqui Jesucristo cheẽ nenei nenei eãte nae, huee Jesucristo cheẽ tasenei senei se, ae que se ra. Emo Jesucristo cheẽ nenei neneisa, huee taico bei eã, ae que se ra. ²¹Sã embesa ji riqui ñee no:

Ae jiranuãte quia Cristo rese, ùquĩ nda jirandu erese cote.

Ûquĩ nda eicua cote,

ĩ que embesa ji ra.

Aso ra Rómaa, i Pablo

²²Ae mbia riqui Dios cheẽ nenei nenei eãte, huee quiato ngue aico nguiã Dios cheẽ nenei nenei. Nyebe aico nguiã osoãte jendea. ²³Cose ndarechõ mbei chõ aico rei nguiã “taso jendea”, i. A jenda mbia que Dios cheẽ ñandu tuchi cote ra. Nyebe taso jendea cote. ²⁴Seso mose España nda aso jendea. Sembia jiri sacua jendese. Taico mbĩrĩ na jendese huee. Jë nda sembucuata turã mondo hue si cote chã. ²⁵Jerusalén nane nda aso. Ofrenda mo arao quia Jesús quiato je co. ²⁶Jesús quiato Macedonia jenda que ofrenda munua nua nda. Jesús quiato Acaya jenda rese. — Jesús quiato mbaecha reã je mbae nandemondo rã Jerusalén jenda je, i que ñee nyue nyii ra. Ûquĩ ño arao nguiã co. ²⁷Coche ùquĩ ndiqui nguiã mbae mondo judíos Jesús quiato je. Judíos rane nguiã Dios cheẽ senei senei tare nguiã judíos eã je. Nyebe ra judíos eã mbae mo mondo judíos Jerusalén jenda je cote. ²⁸Nyebe ra ofrenda munua ji arao ee. Jesús quiato mbaecha reã je. Aquere ra aso España quti cote. Aicha ra ñeenda cúa si mae jendese. ²⁹Jesucristo ra semondo turã jendea. Ae ra nandembia ja uturã je. ³⁰Seresenda, Jesucristo quiato quia jë nde. Espíritu Turã ño jembuchesequa nguiã jenyiese ùquĩ. Nyebe jeñee tuchi quia Dios je seriĩ. Nandechẽ ja tuchi quiato ee seriĩ. ³¹—Paba, mbia

icuã Judea jenda esiquisã Pablo si. Paba, ndequiato Jerusalén jenda nda ofrenda isi turã Pablo si chã, jenyẽ chõ Dios je. ³²Ûquĩ mose ra seya tuchi mae jendese cote, Dios “eno” i mose seje. Jendese seico mose ra sequenea aucua tuchi cote. ³³Sã Dios riqui bei jendese. Sã eriqui jembia.

Pablo saludar i ja mbia je

16 ¹Febe jëisi turã ño. Jesús quiato chõ aque cuña nde. Mbae turã esaã saã mbeite quia Jesús quiato Cencrea jenda je aque. ²Jëisi turã ño nguia Jesús riĩ. Sã Jesús quiato riqui nyiisi turã no, eĩ jenyẽ chõ Febe isi turã no. Ae que mbae turã saã saã mbeite Jesús quiato je ra. Seje abe no. Nyebe jëturã ño jẽ abe ee. ³Aquila je saludar jenyẽ rã seje. Eninisi Priscila je abe no. Serese que ùquĩ ndiqui Jesucristo cheẽ nenei nenei tuchi ra. ⁴Mbia que eiquia serĩ serĩte rei quia serĩĩ nda. Siquicheã mbeite que equia ra. Nyebe aico nguĩã gracias i tuchi ee. Se ae eã. Jesús quiato judfõs eã abe riqui gracias i jate ee ã. ⁵Ae Jesús quiato ñumunua nua nguia Aquila chuchua, ùquĩ je abe saludar jenyẽ. Epeneto je abe saludar jenyẽ. Sequiato tuchite que aque ra. Ae rane ngue Cristo isi Acaya jenda ra. ⁶María je abe saludar jenyẽ. Ae que mbae saã saã tuchi Dios je jësaa ra. ⁷Andrónico je abe saludar jenyẽ. Junias je abe. Se sí chõ ùquĩ nde. Serese que etarõ ji riqui cárcel nda. Dios cheẽ nenei neneisa tuchi chõ ùquĩ nde. Ûquĩ nane ngue Cristo icua sesi cose ra. ⁸Amplias je abe saludar jenyẽ. Sequiato tuchi chõ Dios resenda aque re. ⁹Urbano je abe saludar jenyẽ. Ae que Dios cheẽ senei senei nguia urerese ra. Sequiato Estaquis je abe saludar jenyẽ. ¹⁰Apeles je abe saludar jenyẽ. —Seicuaasa tuchi Apeles riqui co, i que Dios Apeles riĩ nda. Aristóbulo chuchua jenda je saludar jenyẽ seje. ¹¹Herodión je abe saludar jenyẽ. Se sí chõ ae re. Narciso chuchua jenda, ae Jesús quiato nae, ùquĩ je saludar jenyẽ. ¹²Trifena je abe saludar jenyẽ seje. Trifosa je abe. Ûquĩ ndiqui mbae raã naa tuchi Dios je ùquĩ. Nandequiato Pércida je abe saludar jenyẽ. Ae que mbae saã saã tuchi quia Dios je ra. ¹³Rufo je abe saludar jenyẽ. Dios chiirabo tuchi chõ ae re. Esi je abe saludar jenyẽ. Taĩ na tuchi que eriqui seje ra. Mbae que esaã ja tuchi quia seje ra. ¹⁴Asíncrito je saludar jenyẽ seje. Flegonte je abe. Hermas je abe. Patrobas je abe. Hermes je abe. Ae Jesús quiato riqui ùquĩ ndese, ùquĩ je abe saludar jenyẽ. ¹⁵Filólogo je abe saludar jenyẽ. Julia je abe. Nereo je abe. Enongue je abe. Olimpas je abe. Ae Jesús quiato riqui ùquĩ ndese, ùquĩ je abe saludar jenyẽ. ¹⁶Jenyiquiaama ama saludar i nyue. Tuchuamo jenda ja Cristo quiato riqui saludar i jëje ã.

¹⁷Huee emo ndiqui Jesús quiato mbiicua sete hue. Hue emo ndiqui “Jesús quiato tambiicha Jesús si”, ite hue. Jenyicuasẽ ño nguia ùquĩ si. Jesús cheẽ ndui si eã ño eriqui nguĩã mbia mbaaquiato quiato ùquĩ. ¹⁸—Ae Jesucristo bite, ùquĩ nandesã saã, iã ño nguĩã ùquĩ. Ubi achõ

ño esaã saã nguiã ùquĩ. Echeẽ turã aba reã ño eriqui nguiã mbia je ùquĩ. Ae Jesucristo icua tuchi eãte quia nae, ùquĩ mbiĩrĩ irĩ ño nguiã ùquĩ. Jenyĩicuasẽ tuchi chõ nguia ùquĩ si. Aba mbiĩrĩ irĩsa tuchi chõ ùquĩ nde. ¹⁹Jẽ ngue Dios cheẽ jemumbayãte ra. Mbia que jirandu jate jendese ra. Nyebe seyate riqui nguiã jendese co. Jẽingo bei nda equia mbae turã ndese chã. Mbia nda jembiĩrĩ irĩ eã jiri quia mbae icuã je chã. ²⁰Dios quiarei aba mbiasa. Namó jiri ra ae Satanás ndiquisã mbei jẽsi cote. Sã Jesucristo riqui turã mbei jẽje.

²¹Timoteo ucheẽ mondo quia saludar i jẽje aque. Siqui beite equia serese Dios cheẽ nenei nenei co. Lucio abe ucheẽ mondo quia saludar i jẽje aque. Jasón abe no. Sosipáter abe no. Se sí chõ ùquĩ nde.

²²Se abe secheẽ amondo quia saludar i jẽje aque. Tercio rei se. Se chõ aico nguiã Pablo cheẽ mbesa mbesa jẽje co. Jesús icuasa ja chõ nande re. ²³Gayo abe ucheẽ mondo quia saludar i jẽje aque. A aico rã echuchua uque a. Jesús quiato chumunua nuasa bei chõ a re. Gayo chuchua. Erast o abe ucheẽ mondo quia jẽje aque. Ae chõ tesorero sucha tubiriã jenda je. Cuarto nandequiato abe ucheẽ mondo quia jẽje aque. ²⁴Sã Jesucristo riqui jendeaquiatu turã mbei. Amén.

Pablo ñee hui bei sacuã cote

²⁵Nandechẽ turã mbei chõ nguia Dios riĩ. Ae ra jembirãcuã tuchi mingo ucheẽ turã je. Echeẽ turã ngue asenei senei nguia Jesucristo riĩ nda. Aque cheẽ turã ngue mbia icuayãte quia cose nyii ra. Dios que embuchecua eã mbei mbae ao ramo mosenda bei ra. ²⁶Namó ño Dios ucheẽ turã mbuchecua nguiã mbia je cote. Jesucristo riĩ. Dios cheẽ nenei neneisa que echeẽ mbuchecua nande je cote ra. Mbesa que nande je ra. Dios que ñee seje ra. —Secheẽ turã esenei senei mbei quia mbia jaje cote. Siqui sacuã secheẽ ndese. Secheẽ mumbayã sacuã, i que Dios seje cote ra. ²⁷Dios miĩ nguiarei siqui bei. Dios miĩ ño mae ja nguiã mbae ja rese. Sã Jesucristo riqui mbia mbucheẽ turã mbeite Dios riĩ. Amén.